



# **TUSI FAITAU ASO**

**KUATA 3**

**IULAI - SETEMA 2023**

EKALESIA FAAPOTOPOTOGA KERISIANO I AMERIKA SAMOA



# **TUSI FAITAU ASO**

**KUATA 3**

**IULAI - SETEMA 2023**

EKALESIA FAAPOTOPOTOGA KERISIANO I AMERIKA SAMOA

## **Aso Toona'i – Iulai 1: “Fa’atafunaga ma le fa’amoemoe”**

**Tusi Faitau – Amosa 9:1-15** (*Destruction and hope*)

**Matua – f.13-14:** “*Fa’auta e o’o mai ona aso...e tautulu mauga i le suavine, e tafea ai mea maupu’epu’e uma...ou te fa’afoisia mai...ona latou fa’atuina ai lea o ‘a’ai ua fa’atafunaina...latou te totoina fo’i tovine...latou te fai fo’i fa’ato’aga, ma a’ai ai ona fua.*”

I lenei vaiaso ma ona faitauga mai i le tusi o Amosa, o lo’o atagia mai ai fa’anoanoaga loloto e le aunoa. Peita’i, o le faitauga mo lenei aso e peiseai ua atagia mai ai se fa’amoemoe fou mo le lumana’i. E moni, o le Atua alofa e fa’aalia lava lona fa’amasinoga tonu ina ia mafai ai e le tagata ona lagona le taunu’uga e afua mai i a latou filifiliga. E ui i lea tulaga, o lo’o i tua atu le alofa mutimutivale, ma fatu o mea sili o lo’o i le lumana’i. I fuaiupu ia ua fai ma matua, o lo’o atagia mai ai se fa’amoemoe fou mo se lumana’i manuia. Ae afai tatou te fia ola i le moni o lea fa’amoemoe, e tatau ona uia le fa’agasologa o le salamo, fa’afouina, ona liua ma suia ai lea o i tatou. Ma, o nisi fo’i taimi e o’o mai tofotofoga ona o taunu’uga o a tatou filifiliga, e saunia ma tapenaina ai i tatou mo le fa’agasologa o le a uia; e mafai ai ona sui le tatou va’ai i le olaga ma tatou ave ai le fa’amuamua i mea e sili ona taua.

O nisi taimi e o’o mai ai fa’alavelave ona o a tatou filifiliga, ae o le tele o taimi o fa’alavelave e feagai ma tatou o le taunu’uga o filifiliga ua fai e i latou o lo’o i ai le pule; o filifiliga lava e sa’ilia ai le amiotonu mo e matitiva ma e vaivai. Po o le a lava, ua aumaia e Amosa le fa’amoemoe ia i tatou – o le a iai le fa’amasinoga tonu, o lo’o i ai pea le malamalama, o lo’o fa’atasi mai pea le Atua. O le fa’amasinoga tonu a le Atua e aofia ai le toefuata’ina o mea na leiloa. Ua lapata’ia i tatou e Amosa ina ia vave tali atu, ia gaoioi ma le tonu, ma a tatou fesaga’i ma fa’alavelave, ia ola ma le fa’amoemoe mo le lumana’i.

**Tatalo:** Le Ali’i e, a o matou vala’au atu i le tatalo, ia matou manatua, po o a faigata ma fa’afitauli e o’o mai, e te le o tu’ulafoa’i lava i matou. **Amene.**

## **O LE EVAGELIA A MATAIO (4)**

### **1 - Fa’ataoto ma fe’ese’esea’iga** (*Parables and controversies*)

## **Aso Sā – Iulai 2: “Saunia mo suiga fou a le Atua?”**

**Tusi Faitau – Mataio 13:1-17** (*Ready for God’s coming revolution?*)

**Matua – f.16-17:** “*Amuia o outou mata, aua ua va’ava’ai; ma o outou taliga, aua ua fa’alogo; aua e moni, ou te fai atu ia te outou, E toatele perofeta ma tagata amiotonu sa naunau i le fia iloa o mea ua outou va’ai ai, a e le’i iloa; na latou fia fa’alogo fo’i i mea ua outou fa’alogo i ai, a e le’i fa’alogo ai lava.*”

O fa’ata’oto a Iesu e uiga i le Malo o le Atua o le a o’o mai, e ta’u fa’atauva’a ai malo malolosi o lo’o i ai nei. E le o tagata uma o le a malamalama pe ‘auai fa’atasi i le mea o lo’o faia e le Atua. O le mea moni, o le tuputupu a’e o le finagalo o le Atua ina ia tumu le lalolagi i le filemu e pei ona tumu ai le lagi, e le tupu e aunoa ma ni tauiviga. E atagia mai lava lenei mea i le faitauga

mo lenei aso. I le taimi na avea ai saito ma taumafa autu na ola ai tagata, e foliga mai ua fa'amaumau e le faifa'atoaga se tasi o aseta e sili ona taua.

E pei o le tele o ana fa'ataoto, aumaia e Iesu se manatu e ta'u fa'atauva'a ai le mea masani e ala i le fa'atusatusa ma le tu'u'ese'ese. E pei lava ona latou masani ai, o le faifaato'aga e na'o le lūlūina o fatu i le 'ele'ele lelei, e faapena fo'i ona filifili le tagata faigaluega o le malo ina ia galue ma nisi ua latou manatu o le a tali mai. Ae e ui atonu e mafai e le faifaato'aga ona iloa le mea o lo'o i ai le 'ele'ele lafulemu, e le mafai ma e le tatau ia i tatou ona tatou taumatemate. E moni, o saito e i'u lava ina mate pe a lafo fatu i luga o ala faigata, po o ma'a, po o vao tuitui ma la'au talatala; e faapena foi i loto o tagata, aua e le o loto uma ua saunia e tofo i le fatu o le filemu a le Atua i o latou olaga. A o loto ma olaga ua saunia, e mafai ona fa'ateleina le agalelei o le Atua i ni auala ofoofogia. E tatau lava i tagata lulu saito ona tutumau pea.

**Tatalo:** Le Alii e, 'aua ne'i matou pipi'imaui malosiaga o lo'o i ai nei, ne'i matou misia ai suiga fou o le a o'o mai. **Amene.**

**Aso Gafua – Iulai 3: “Tutumau ma le fua tele mai”** (*Grit and fruitfulness*)  
**Tusi Faitau – Mataio 13:18-43**

**Matua – f.23:** “*A o le mea sa luluina i le 'ele'ele lelei, o ia lea ua fa'alogo i le upu, ma lagona ai; ua fua mai lava ia, e ta'iselau i nisi, e ta'ionogafulu i nisi, e ta'itolugafulu fo'i i nisi.*”

Fa'atusa e Iesu eleele 'ese'ese i tagata. O nisi, e pei o le sima, e pogisa ma le malamalama i mea fou ua faia e le Atua. O isi e pei o eleele ma'ama'a, e malamalama ma fiafia i le mea fou ua faia e le Atua, ae le o maua'a i le fa'atuatua. E pei o le tusi faitau ananafi, e tatau ona tatou fa'asoa atu o tatou olaga ma le alofa o le Atua i tagata 'ese'ese uma; auā e le mailoa poo fea le eleele lelei. O lona uiga, a uma ona lūlū le fatu, e iai isi galuega e manaomia ona fai. E tatau ona galue ma le finafinau ma le onosa'i, e mana'omia fo'i ona tutumau! Ae manatua, poo a galuega e taumafai ai, e le fua mai lava se fatu e lūlū i luga o le sima. A taumafai pea, e le o le onosai la, ae atagia mai ai le fa'asausili ma le manatu faapito.

E le faatoilaloina i latou i le mata'utia o fa'alavelave po o sauaga, ona o lo'o mumu le afi o le Agaga Pa'ia i totonu o latou loto ina ia latou faia ai mea sili, ma mea ua latou manatu e sili fo'i ona aoga. E uiga ese le tele o le ola e tafe mai ia i latou, pe a tatou onosai ma tumau fa'atasi ma i latou. E o'o lava ia i tatou, e mafai ona avea ma 'ele'ele lelei, o tagata e fua tele mai ai le finagalo ma le galuega a le Atua.

**Tatalo:** Le Alii e, ia matou lulu pea fatu e tatau. Ia maua le malamalama, le lotomau, ma ia maua'a le fa'atuatua e fua tele mai ai lou finagalo. **Amene.**

**Aso Lua – Iulai 4: “E aoga le foa'i atu o mea uma?”**  
**Tusi Faitau – Mataio 13:44-58** (*Is giving all worth it?*)

**Matua – f.44:** “*E tusa fo’i le malo o le lagi i le ‘oa ua natia i le fanua; ua iloa e le tasi, ona nana ai lea e ia; ua alu fo’i ma le fiafia, ma fa’atau atu ana mea uma, i le fa’atau a’i mai lea fanua.*”

E tele lava le ‘ese’ese o le fa’atuatua ma togafiti fa’ataulaitu. O faiga fa’ataulaitu e taumafai ina ia pulea le agaga ma le tino i faiga togafiti ina ia maua mea tatou te manana’o ai, ae o le fa’atuatua e tu’uina atu o mea uma ma fa’amoemoe i le Atua ina ia mafai ona ia faia le mea e finagalo ai o ia i le lalolagi e ala ia i tatou. O le mea e mana’omia e tete’e atu ai i faiga fa’ataulaitu ma avatu ai o mea uma, e pei o le na foa’iina atu mea uma, o le fa’atuatua i le sa faia le fa’ata’ita’iga mo i tatou. A aunoa ma lena, e faigofie tele ona gau’i atu i ai faiga fa’ataulaitu ma misia le moni o le olaga. I le isi itu, afai tatou te tu’uina atu mea ua tatou maua, o lona uiga ua tatou tofo ma iloa le lelei o le Atua. E pei o le tagata sa’ili’ili e ave o ana ‘oa i se isi tagata ina ia fa’amaonia ai le taua moni, ua tatou iloa ai o Iesu o le ‘oa moni lava, e mafai ai ona tatou lafoa’i i mea e le taua ma ola fiafia ai i lenei lalolagi. O lenei fouvale i togafiti ma faiga fa’ataulaitu e le o fa’atauaina ai lavalava, musika, po o teuga fo’i e faia i o tatou tino; ae o le tu’uina atu o le ola atoa ina ia iloa ai le finagalo moni o lo tatou Ali’i, ma tatou tali fa’amaoni i ai. O le tofo i se olaga fa’apena e leai se mea e fa’atusa i ai, e aoga le tu’uina atu o mea uma tatou te maua e tulituliloaina ai.

**Tatalo:** Le Ali’i e, fesoasoani mai ia matou lafoa’i uma togafiti. Fa’asa’oloto i matou ina ia avatu mea uma mo lou malo. **Amene.**

**Aso Lulu – Iulai 5: “Sau mai le utiuti i le fa’amalieina”**

**Tusi Faitau – Mataio 14:1-21** (*Moving from scarcity to satisfaction*)

**Matua – f.16-17:** “*A ua fetalai atu Iesu ia te i latou, ‘E le aoga ona latou o; ia outou avane ni mea latou te ‘a’ai ai.’ Ona latou fai mai lea ia te ia, ‘E leai ni a tatou mea ‘i’inei, ua na o areto e limagafua ma i’a e lua lau.’ ”*

E le tutusa lagona o le ‘ausoo ma Iesu e uiga i le fia ‘a’ai o le motu o tagata. Ua leva le aso, ma ua amata ona fa’aalia e le ‘ausoo uiga e tusa ai ma le utiuti o a latou mea. Ua va’aia e le ‘ausoo mana’oga ma fa’afitauli o lo’o si’omia ai latou, ae ua fa’apea fo’i ona latou manatu i le utiuti o taumafa o lo’o ia i latou e fafagaina ai ia tagata e to’atele.

O le fesili a Iesu po o a mea i o latou lima, ua lu’i ai lagona a le ‘ausoo. Sa le manatu Iesu i le utiuti, ae sa mafaufau i le anoanoa’i o mea ua foa’i mai e le Atua mo le tagata. A tatou tilotilo i tagata ma nu’u tatou te ‘au’auna i ai, e maua fo’i ia i tatou le atuavale po o le fefe pe lofituina fo’i i manaoga e le’i fa’amalieina e pei o le ‘ausoo. Ae peita’i, e mafai fo’i ona tatou ‘auai fa’atasi ma Iesu i le su’esu’eina o malosiga ma mea ua mafai ona ofoina atu. E pei o nisi upu fa’a Peretania, “*Use what’s strong to fix what’s wrong*”.

E le’i faia e Iesu se mea mo e malolosi ma e mafai lava ona latou faia. E moni, o ana vavega na faia mo le galulue fa’atasi, o le fa’amalosi atu, ma le fa’aeaina o tagata e sili ona vaivai. O ‘a’ao lava a Iesu, ua lava ma totoe ai o

areto ma i'a mo le motu o tagata. Ae pei ona tatou molimauina i le tumutumu o tagata e fa'atau motu ma fa'aputu 'oloa i le taimi o le Koviti-19, e malosi pea le ola popole ma le atuatuavale o tagata ona o mafaufauga i le utiuti ma le lē lava o le fa'asoa. Ua mumusu tagata e fa'asoa atu a latou 'areto ma i'a laiti ne'i le lava mo latou. O le ola fa'aputupu, e tupu ai le matape'apea, o le fefe vale, o le lē talitonu o le isi i le isi, ma le lē mautu.

Peita'i, o le fa'atuatua, e aga'i i le isi itu. Afai e mafai ona tatou fa'asoa mea ua tatou maua ma le fa'atuatua, e tutupu vavega i o tatou olaga. Atonu e amata lēmū muamua, ina ia fa'amasani ai, ae mafaia lava e tatou i le fa'atasi mai o Iesu. O le sau mai i le utiuti e fa'agasolo atu i le fa'amalieina o le loto i mea ua maua i o tatou lima, o se tasi lea o suiga ua mana'omia lava ona tatou manatunatu ma mafaufau loloto i ai i nei ona po.

**Tatalo:** Le Ali'i e, e tu'uina atu i lau afio i lenei aso mea ua matou maua. Fa'amanuia mai ma ia fa'amalieina i matou i mea ua matou maua. **Amene.**

### **Aso Tofi – Iulai 6: “La’a ese mai le va’a i taimi o ‘afa”**

**Tusi Faitau – Mataio 14:22-36** (*Stepping out of the boat in storms*)

**Matua – f.29-31:** “*Ona alu ifo ai lea o Peteru nai le va’a, ua savali i luga o le vai e alu ia Iesu. Ua va’ai o ia I le matagi ua tetele, ona fefe ai lea; ona afua ai lea ona goto, ua alaga mai, ‘Ali’i e, fa’aola mai!’ Ona a’apa atu loa lea e Iesu o lona ‘a’ao, ua tago ia te ia, ua fa’apea atu ia te ia, ‘O oe na, le fa’atuatua itiiti, se a le mea ua e masalosalo vale ai?’”*

E masani ona fa'aalia mai e Mataio le 'ausoo o lo'o feagai ma faigata ma fa'afitauli e aunoa ma Iesu. I le faitauga o lenei aso, ua tu'ua Iesu i le matāfaga ae malaga atu le 'ausoo i le sami i se tama'i va'a i le afiafi. Ina ua po, ua agi malosi mai le matagi ma taia ai lo latou faigamalaga. Atonu o le taimi lea ua fefefe ma le lē mautonu i le 'ausoo, e le gata i le tino, a o le agaga foi ma le loto! A o le taimi lea ua savali atu ai Iesu i luga o le vai e aga'i atu i ona so'o a o agi le matagi. “Ia outou loto tetele; o a'u lava, 'aua tou te matata'u”. Na le iloa e Peteru o Iesu, ma ua ia manatu o se aitu ua alu atu e fa'aumatia i latou, ae na ia tofotofa loa i ai: “Le Ali'i e, afai o oe, ia e fetalai mai ia te a'u, ou te alu atu ia te oe i luga o le vai”. Na talia e Iesu ma ua alu ese loa Peteru mai le va'a, ma ua ia savali i luga o le vai. Peita'i, ua fefe o ia i le sou o le sami ma le fāfati o galu. Ua ia vala'au atu loa ia Iesu ina ia fesoasoani atu. Na vave lava ona tago atu Iesu ia Peteru, ma ua la o atu fa'atasi loa i le va'a, ma ua fa'afilemu e Iesu le matagi.

E i ai taimi e pei ai tatou o Peteru: o taimi tatou te fefefe ai, o taimi e tele ai fa'afitauli, ma taimi tatou te le iloa ai Iesu. Peita'i, e le fa'apea le tatou Ali'i fa'aola o Iesu. E na te ulufale mai i o tatou loto ma fa'ato'afilemuina le tele o matagi o lo'o feagai ma i tatou i le olaga nei. E na o sina fa'atuatua itiiti lava ia Iesu e mo'omia e tutupu ai suiga tetele.

**Tatalo:** Le Ali'i e, fesoasoani mai ina ia matou savali ma le fa'atuatua ma talitonu o lo'o e puipuia o matou ola. **Amene.**

**Aso Faraile – Iulai 7: “Aga’i i le mafua’aga?”** (*Moving to why?*)

**Tusi Faitau – Mataio 15:1-20**

**Matua – f.1-2:** “*Ona o mai ai lea ia Iesu o tusiupu ma faresaio mai Ierusalem, ua fa’apea mai, ‘Se a le mea ua soli ai e ou so’o le uputu’u a e anamua?’ Aua ua le fafano o latou lima pe a latou ‘a’ai.’*”

O le tatou filifiliga e tausia tu ma aga, metotia, ma fa’avae ae le tausia isi, e ese ma le taua. E tele lava taimi ua tatou tausia pea ma fa’atumaui nisi o tu ma aga ua le toe aoga, ma e tutupu mai ai fa’afitauli. O mea na amata mai e lelei, e i ai lava taimi e avea ai ma fa’alavelave i le misiona a le Atua. Sa fa’apea fo’i i le taimi o Iesu; o le ‘au Faresaio ma le ‘au Satukaio na taumafai ia fa’amaoni tagata Isaraelu i le tausia o a latou tu ma aga masani ma ua latou feita ia Iesu ona o lona fa’atautee. Silafia e Iesu lo latou fa’afoliga, ma fesiligia po o fa’amaoni lo latou tausiga o uputu’u, pe ua latou faia ona o le mafua’aga ua i ai nei tu ma aga?

E pei o Iesu, e tatau ia i tatou ona sa’ili’ili le mafua’aga tonu o tu ma aga masani. O tu ma aga e feso’ota’i lelei ma le feau a Iesu, e tatau lava ona tatou tausi fa’amaoni i ai. I le isi itu, a tatou faia o tu ma aga e aunoa ma le iloa o mafua’aga sa mua’i fai ai, ua tatou le fa’amaoni i le ulua’i fa’amoemoe ma ua le talafeagai ai loa ma mana’oga o aso nei.

**Tatalo:** Le Ali’i e, fesoasoani mai ia fai matou ma ou tagata i le lalolagi i lenei aso ma aso uma lava. **Amene.**

**Aso Toona’i – Iulai 8: “Momoi mea ma le tele o mea”**

**Tusi Faitau – Mataio 15:21-39** (*Crumbs and abundance*)

**Matua – f.28:** “*Ona tali atu ai lea o Iesu, ‘Funa e, ua tele lou fa’atuatua; e pei o lou mana’o, ia fa’apea lava ona faia ia te oe.’ Ona malolo ai lea o lana tama teine i lea lava itu aso.*”

I le faitauga mo lenei aso, e lua tala ia o lo’o fa’amatalaina fa’atasi. O le autu e feso’ota’i ai, o le mo’omia o le fa’atuatua ina ia iloa ai fa’amanuiga e tele a le Atua. I le tala muamua, o le fafine o lo’o ole atu ia Iesu e fa’amalolo lana tama teine. O le fafine Kanana, e le o se Isaraelu, ma na foliga mai sa mua’i tete’e e Iesu. Na tumau lava le fafine ma fa’atagisia le alofa mutimutivale o le Atua. Na suia le mafaufau a Iesu, na ia fa’amalolo atu i le afafine, ma na ia fa’amalo atu i le fafine ona o lona fa’atuatua tele.

E fa’aaau le tala i le o atu o le ‘ausoo i le mauga ma Iesu, fa’apea ma le motu o tagata. Ua latou va’ava’ai vavega ua faia e Iesu, ma ua atoa aso e tolu e le’i ‘a’ai i latou. Sa tatou faitau muamua fo’i i lenei tala i le amataga o le tatou vaiaso. Ua tatau ona iloa e le ‘ausoo le mea e fai, ia latou tu’u atu mea uma ua latou maua ia Iesu, ona manuia ai lea o mea uma. Sa fa’aalia la e le ‘ausoo le fa’atuatua e pei o le fafine Kanana? E leai lava.

Na mana’omia uma e Iesu ma le fafine Kanana ona tutumau ina ia va’aia ai le tafe tele mai o le alofa mutimutivale o le Atua. E le’i taumafai la’ua ina ia uia se auala pu’upu’u pe faigofie, pe faia fo’i o mea e mafai e isi ona fai.

**Tatalo:** Le Alii e, ia matou fa’asoa atu mea ua maua i o matou lima; ua matou iloa o lo’o i o ou lima ‘oloa e tele. **Amene.**

## O LE EVAGELIA A MATAIO (4)

### 2 – Atali’i o le tagata, Atali’i o le Atua (*Son of Man, Son of God*)

**Aso Sā – Iulai 9: “Sa’ili ni fa’ailoga”** (*Looking for signs*)

**Tusi Faitau – Mataio 16:1-12**

**Matua – f.2-3,** “*A ua tali atu o ia, ‘A o’o i le afiafi ua outou fai ane, E laofia; aua ua mumu mai le lagi. O le taeao fo’i ua outou fai ane, E uaga le aso; aua ua mumu mai, ma fa’amalumu ifo le lagi. Ua outou iloa ona matauina amio a le lagi, a o fa’ailoga o tausaga tou te le mafaia ea?’*”

E i ai upu i le gagana fa’a Peretania e fa’apea, “*Red sky at night, shepherd’s delight; red sky in the morning, shepherd’s warning*”. Sa ou manatu lava o ia upu o talatu’u mai anamua, ae ua iloa i le faitauga mo lenei aso, o upu e afua mai ia Iesu, ma a tu’u i le itu fa’asaïenisi, e sa’o lelei! Ona o lea, e foliga mai e mafai fo’i ona matauina le tau ma amio a le lagi mo taeao. A o “Fa’ailoga o tausaga”, pe afai e pau lava le mea ou te va’ava’ai i ai o tulaga fa’apolokiki o lenei lalolagi ma ou taumafai e sa’ilia ai le upumoni, e tutusa le fa’afitauli o le a feagai ma a’u ma fa’afitauli sa feagai ma le ‘au Faresaio ma le ‘au Satukaio.

O nei vaega e lua e le’i vavalalata i tulaga fa’apolokiki po’o agafeso’otai, ae na maua lo latou lotogatasi i le manana’o e fasioti Iesu. Mo ia vaega, sa tataua ona i ai se fa’ailoga e fa’asalalauina mai ai se perofeta po o se ta’ita’i moni, a ua latou fai ma lava ua latou le iloa se mea. O le mea lea na fetalai ai Iesu i lo latou tauaso, aua ua uma ona fa’aali mai le fa’ailoga e ala ia Iona. E le na o le i’a tele, a o le tala atoa e maua ai le fa’ailoga: o le salamo, o le alofa mutimutivale, fa’apea le fa’amalologa mo Iona - o le fa’aaliga lea o uiga o le Atua. O le fa’ailoga lenei, o le upu mulimuli mai i le Atua, o lo’o fa’aali ia Iesu, ae ui i lea e le iloa atu lava le upumoni tusa lava pe o lo’o i ou luma. Afai e le mafai ona e va’aia le Atua i totonu ia Iesu, e leai lava se mea e mafai ona fa’atalitua ona o.

**Tatalo:** Ia pupula mata o le lalolagi sa’ili, ina ia iloa ai le alofa ma le malamalama o Keriso i o tatou olaga. Ma a va’ai, ia talitua ai loa. **Amene.**

**Aso Gafua – Iulai 10: “Se a la outou upu ia te a’u, po o ai?”**

**Tusi Faitau – Mataio 16:13-28** (*Who do you say I am?*)

**Matua – f.15:** “*Ona fetalai atu lea o ia ia te i latou, ‘A o outou, pe se a la outou upu ia te a’u, po o ai?’*”

O fa’alagiga o tagata e fa’aeteete ai lava, aua o aso nei ua tele ona tu’uina atu fa’alagiga ona o le tali atu i mana’oga o ta’ita’i nai lo’o galuega lelei e fai. Ae ui i lea, o nisi tagata e talafeagai i ai le fa’aaloalo ona o mea lelei ua latou faia i le olaga nei. A o le fesili, o le a la le fa’alagiga e sili ona fetuiai ma Iesu?



O nisi na va'ai ma fa'alogo ia Iesu, na fa'apea o ia o Ioane le Papatiso ua toetu mai i le oti, o isi na fai mai o Elia po o Ieremia. O ia fa'atusa i tagata taua o le latou fa'atuatua, o se fa'aaloalo tele lava. Afai lava e fa'afuase'i ona toetu mai o se tasi o ia perofeta, o lona uiga ua latalata mai le malo o le Atua! Ae sa le fia fa'alogo Iesu i lena mea ina ua ia fesili atu i ona so'o, "Pe se a la outou upu ia te a'u, po o ai?"

Ou te mafaufau lava po o le a se mea na o'o ia latou i lea taimi a o latou mafaufau e tali atu - e uiga i ana a'oa'oga, o lana pule, ma lana mana. O ai e Iesu? Pe o ia o se faia'oga, o se perofeta, pe sili atu? O Peteru lava na ta'ua o ia "O le Mesia - le Alo o le Atua soifua", ma o 'iina na silafia ai e Iesu o le a lelei mea uma aua o lo'o i ai se tasi na malamalama.

**Tatalo:** Ia matou iloa atili oe, mulimuli, ma fa'atagaina lou alofa e avea ma totonugalemu o mea uma matou te faia ma tautala ai. **Amene.**

**Aso Lua – Iulai 11: “Atali’i o le Atua” (Son of God)**

**Tusi Faitau – Mataio 17:1-13**

**Matua – f.4-5:** “*Ona fai mai ai lea o Peteru ia Iesu, ‘Le Ali’i e, e lelei ona ua tatou ‘i’inei; a e finagalo i ai, ou te faia ‘i’inei ni fale apitaga se tolu; mo oe le tasi, mo Mose le tasi, mo Elia fo’i le tasi.’ Fa’auta, o le ao pupula ua ufutia ai i latou a o tautala ia; fa’auta fo’i, o le si’ufofoga mai le ao ua fa’apea mai, ‘O lo’u Atali’i pele lena, ou te fiasia ia te ia; ia outou fa’alogo ia te ia.’”*

Sa i ai le fa'amoemoe ia Iesu, e le mana'omia e ona so'o o ia e fa'aailoa atu ai le mea sili. Ae tau lava ina ia pupula o latou mata ma iloilo le fa'amaoniga o lo'o i o latou luma, ma latou iloa ai po o ai moni lava Iesu, ae maise ai le tulaga o lo'o i ai latou. Sa tele lava talanoaga, ma ua ta'ua fo'i e Peteru Iesu o le "Mesia!" Ua amata a ona iloa, ma o lea ua ta'ita'ia e Iesu o ana so'o vavalalata o Peteru, Iakopo, ma Ioane i se mea o le a le galo ia i latou i luga o le mauga o Heremoni. O 'i'inei latou te va'aia ai i le malamalama o lo'o fa'amalamalamaina ai Iesu, o le mamalu o le Atua. I tafatafa o Iesu o lo'o tutu ai Mose ma Elia, o se ata o le Tulafono ma Perofeta o le Feagaiga Tuai ua fa'ataunu'uina ia Iesu. Ua ofo atu Peteru e fausia ni fale apitaga se tolu mo i latou. Ae o le fe'au mai le Atua e sili mamao atu nai lo tu ma aga a le Feagaiga Tuai: "O lo'u Atali'i pele lena...ia outou fa'alogo ia te ia!" Ina ua toe va'ai atu le 'ausoo, ua na o Iesu o lo'o tu mai, ma ua ia fa'amatala atu le mea e tatau ona soso'o ai. O le latou uo lenei, o le Mesia, le Alo o le Atua, ma le 'au'auna puapuagatia o lo'o fa'amatalaina i le Isaia 42:1. O lo'o ta'u atu ia i latou, e le tatau ona iloa e se tasi le mea ua latou va'ai i ai, seia toetu mai o ia nai e ua oti. E tele lava lea poloa'iga mo se tasi, ae o lea ua malamalama i latou, ua latou mafaia fo'i so'o se mea!

**Tatalo:** Tau ina ia avea le olaga o lo'o matou ola ai ma upu matou te tautala e fa'aalia ai oe, lo matou Fa'aola, Ali'i, ma le uo mamae. **Amene.**

**Aso Lulu – Iulai 12: “O le iai o le fa’atuatua” (Having faith)**

### **Tusi Faitau – Mataio 17:14-27**

**Matua – f.20b:** *“Ou te fai atu ia te outou, afai e tusa lo outou fa’atuatua ma le fua o le sinapi, e fai atu outou i lenei mauga, alu atu ia oe i lela mea; ona alu atu ai lea; e leai fo’i se mea tou te le mafaia.”*

Ua o ifo Iesu ma le ‘ausoo e to’atolu mai le mauga lea na matua iloa ai le mamalu fa’alelagi o le Atua, ae fa’afetaia’i loa i latou i se fa’afitauli. O se tama mafatia ma lona atali’i ma’i, ua leai lava ma se isi o le ‘ausoo ua mafai ona fa’amaloloina. Na lagonaina e Iesu le le fiafia i lea taimi. Ua uma ona ia tu’uina atu i ona so’o le pule i temoni, fa’apea ma le mana e fa’amalolo ai ma’i uma, ae ui i lea ua latou sa’ili atu lava ia te ia. Pau lava le mea lelei o le tele o le fa’atuatua o le tama ia Iesu, ma lea sa fa’amaloloina ai loa lona atali’i. O le fa’afitauli o lo’o fetalai mai ai Iesu, o lo’o foliga mai e le o mausali lava le fa’atuatua o le ‘ausoo. Masalo ua latou manatu o se togafiti fa’ataulaitu le mana lea sa tu’uina atu ia i latou, ae ua galo ia i latou le mea e afua mai ai. E ese ma le fa’alavelave i lo’u mafaufau pe a ou faitau i ia upu, aua ou te iloa le mea o lo’o fa’apea mai ai Iesu.

A o talavou lo’u fa’atuatua, sa pei a’u o se tamaitiiti, e le fefe e fai se mea e ui i manu’a uma. A o le taimi nei ina ua matua, e foliga mai ua sili atu lo’u pototo, a o nisi taimi ou te le mautinoa ai pe a feagai ma tulaga fa’apena. O le taimi lena e fa’amanatu mai ai ia te a’u o le fetalaiga a Iesu i le ‘ausoo, ua na o le fatu o le sinapi e mafai ai ona si’itia ai o mauga ma fa’ato’ilaloina ai faigata tetele. O le ‘ausoo lava lea na luluina fatu o le Ekalesia lea ua ‘ou ‘auai i ai. E pei ona fetalai Iesu, “E leai fo’i se mea tou te le mafaia”.

**Tatalo:** Foa’i mai ia i matou, le Ali’i e, se fa’atuatua e malosi e si’itia ai mauga uma o lo’o taofia i matou mai le faia o lau galuega. **Amene.**

**Aso Tofi – Iulai 13: “O ai e sili?”** (*Who is the greatest?*)

### **Tusi Faitau – Mataio 18:1-9**

**Matua – f.2-3:** *“Ona vala’au atu ai lea o Iesu i le tamaitiiti, ua fa’atu ia te ia i o latou huma, ua fa’apea atu, ‘E moni, ou te fai atu ia te outou, a le liua outou, ma aveia ia pei o tamaiti, tou te le sao lava i le malo o le lagi.’”*

O tagata soifua e fiafia i mea ua uma ona fa’atulagaina, ma o fa’atulagaga ia o le fa’apogai o le mafanafana, e iloa ai fo’i le tulaga o le tagata i le olaga nei. Ae fa’apefea le malo o le Atua? Ai o le manatu lea na i mafaufau o le ‘ausoo ina ua mae’a le tele o talanoaga e uiga ia Iesu. Aisea na tatau ai ona maliu o ia, ma o lea a le tulaga o le a o’o ia i latou? O fea le latou tulaga i lenei malo, ma o ai fo’i e sili? E masani ona fa’aliliu e le Atua mafaufauga o tagata, ma e mautinoa lava fo’i pe a tatou talanoa e uiga i le maoga e ma le mana. E itiiti lava se fa’atusa o le olaga i le malo o le Atua ma le fa’agaioiga o pisinisi tetele po o faiga fa’apolokiki, ma na filifilia e Iesu o tamaiti e fai ma ana fa’aa’oa’oga. I le tele o aiga e le popole lava se tamaitiiti po o ai e sili, na o le fiafia lava e ‘auai, fa’alagolago ia i latou e alolofa ma tausia i latou, ma talitonu o le a fa’amalieina o a latou mana’oga i aso ta’itasi. O lenei ua fetalai

mai ai Iesu o le ata o le malo o le lagi: o se tasi e lotomaulalo ma fa'atuatua-ina, o se tasi e le popole i tulaga lautele, ma i le lotomaulalo ma le alofa e fa'afeiloa'i atu ia i latou uma ua ta'ua i le aiga o le Atua. O le fa'afeiloa'iga e te avatu i isi, ua fetalai mai ai Iesu e atagia mai ai le fa'afeiloa'iga e tu'u atu ia te ia i totonu o a tatou olaga.

**Tatalo:** Tau lava ina ia i ai pea i o matou loto le taliaina o isi, aua o i tatou uma lava o le fanau a le Atua, ia maua e i tatou le alofa tutusa. **Amene.**

**Aso Faraile – Iulai 14: “O le leoleo mamoe lelei”** (*The good shepherd*)

**Tusi Faitau – Mataio 18:10-20**

**Matua – f.12-13:** *“Pe ni a fa outou? Ai se tagata o i ai mamoe e selau, afai e se le tasi, na te le tu'ua ea le ivagafulu ma le iva i mauga, a e alu o ia e sa'ili i le na se? Afai fo'i na te maua, e moni, ou te fai atu ia te outou, e tele lona olioli i lea, a e itiiti i le ivagafulu ma le iva e le'i se.”*

O le tala lea o lo'o fa'aaogaina e Iesu e a'oa'oina ai i tatou e fa'atatau i le natura o le Atua, ma o lo'o ia fa'atusaina fo'i i tamaiti o le tala mai ananafi, o so'o vaivai ia a Iesu. E ta'u mai ai ia i tatou o le alofa o le Atua e alofa i tagata ta'ito'atasi, aua e taua tele mamoe ta'itasi. E mautinoa lava o mamoe e masani i le feoa'i, e tele fo'i le taimi e alu ai. A o le alofa o le Atua e onosa'i ma e fa'amagalona ai mana'oga o tagata ta'ito'atasi. E le fa'atali i le toe fo'i mai o le mamoe, ae alu lava e sa'ili le mamoe ua le iloa. O le alofa o le Atua e ao lava ina olioli i ai, aua o mamoe feoa'i uma e toe aumaia uma i le lafu mamoe. O leni ituaiga alofa i tagata ta'ito'atasi e tatau ona fa'aalia i totonu o Ekalesia ma so'otaga uma o lo'o i totonu. Ia naunauta'i e galulue fa'atasi ma le lotomaulalo ma le onosa'i, tusa lava pe sololelei pe o'o mai fo'i o taimi faigata ina ia manuia ai le 'au fa'atuatua uma.

**Tatalo:** Fa'afetai lava ona o lou alofa fa'aalia i o matou tagata, **Amene.**

**Aso Toona'i – Iulai 15: “Fa'agafua le 'aitalafu”** (*The debt cancelled*)

**Tusi Faitau – Mataio 18:21-35**

**Matua – f.21-22:** *“Ona alu ane ai lea o Peteru ia te ia, ua fa'apea ane, 'Le Ali'i e, e agaleaga mai fa'afia ea lo'u uso ia te a'u, ma ou fa'amagalo ia te ia? Seia atu fitu ea?' Ua fetalai atu Iesu ia te ia, 'Ou te le fai atu ia te oe, seia atu fitu, a ia fitugafulu ni fitu.' ”*

O numera i le Tusi Paia e masani ona i ai uiga eseese. I tu ma aga fa'alutaia, e mafai ona fa'amagaloina se agasala e o'o i le fa'atolu, ae a o'o i le lona fa, e leai se fa'amagaloga. Ona o lea, atonu na fa'apea Peteru e talileleia e Iesu lona fai atu e o'o i le fa'afitu le fa'amagaloga. A o le tali atu a Iesu na ia fa'apea ai e le mafai ona fa'atapula'a le fa'amagaloga. Mo le to'atele ua o'o i tiga o leni olaga, o le fa'amagalo atu o se fa'atinoga e ese ma le faigata, aua e aveu upu ma sauaga ma avega tau'ave o le olaga. O le fa'amagalo atu e mafai ai ona tatala nisi noanoataga i se tagata, ae o fa'atasi le fa'amagaloga ma le fa'amatuu atu o avega uma.

O lo'o tautala la le fa'ata'oto a Iesu i le tatou faitauga i lea tulaga. Ua feagai nei le 'au'auna a se tasi o tupu ma fa'asalaga, o le avea lea ma pologa mo lona aiga atoa, ina ua ia iloa ua le mafai e ia ona totogiina se aitalafu tele. Ua fa'aalia le alofa o le tupu ma ua ia fa'amagalalo atu le aitalafu a lenei 'au'auna, ae mulimuli ane ua alu lenei 'au'auna ma tauanau mai se aitalafu i le isi fo'i 'au'auna. Na toe 'a'ami e le tupu le 'au'auna sa ia fa'amagalalo i ai, ma na ia tu'u atu fo'i se fa'amasinoga ma se fa'asalaga ia te ia.

O se tala e faigata tele, a o se tala fo'i e faigofie lava lana a'oa'oga. O i latou ua maua le fa'amagaloga, e tatau fo'i ona latou maua le loto e fa'amagalalo atu ai i se isi tagata. O agasala e tele a le tagata na i'u ai lava ona maliu le Alo o le Atua. O le tatou aitalafu tele lava lea. A tatou talia le fa'amagaloga sili i o tatou loto, ua fa'amagaloina fo'i lo tatou aitalafu, ma e toe soso'o ma fa'aleleia ai mafutaga. A maua e i tatou le loto fa'amagalalo, e maua ai fo'i e i tatou le avanoa e toe fa'aleleia ai mafutaga ua malepelepe, fa'apea fo'i ma le ave'eseina o avega mamafa ua tatou tau'veina ona o le tatou le fa'amagalalo atu.

**Tatalo:** 'Ia maua e i matou le loto fa'amagalalo. Ia matou naunau e fa'amatu'u atu avega mamafa, ma ia avea ma tagata e te finagalalo i ai. **Amene.**

## FA'AMAONI – FAITHFULNESS

### 1 - O le fa'amaoni o le Atua ia i tatou (*God's faithfulness to us*)

**Aso Sā – Iulai 16: “Alofa tumau”** (*Steadfast love*)

**Tusi Faitau – Salamo 33**

**Matua – f.4b:** “*Ua faia fo'i e ia ana galuega uma i le fa'amaoni.*”

O le amiotonu a le Atua, o lona fa'amaoni lava lea. E naunau le Atua i ona tagata, ae maise lava le nu'u filifilia o Isaraelu lea sa latou osifeagaiga; o lona alofa fa'aalia i le nu'u o Isaraelu e le maluelue lava. E fa'apea fo'i le manatu a le fai Salamo i lenei aso. O le Atua e le gata lona va'ai i atunu'u ta'itasi ma le lalolagi tele. E moni na ia faia le lagi ma le lalolagi, a o lona alofa e o'o lava i tagata ta'itasi uma. Ma e ui o isi taimi e a'afia le tatou lagonaina o lona alofa i lo tatou tali atu ia te ia, e tumau lava lona alofa, e ui i le tele o fita ma faigata.

O le upu moni lava, e le mafai e tatou ona taofia le alofa o le Atua mo i tatou! E tusa lava pe tatou te fultua ia te ia pe te'ena lona alofa, e alofa pea le Atua ia i tatou. Atonu e le o taimi uma tatou te lagonaina ai le alofa o le Atua ona o a tatou filifiliga po o filifiliga a isi, ae e mafai ona tatou fa'amoemoe pea i le alofa o le Atua e tausia ai pea i tatou, e tusa lava po o ni auala e le mafai ona tatou valo'ia; pe mana'o fo'i i ai! Ia tatou mautinoa lava i le alofa o le Atua mo i tatou ma le fa'atuatua e tumau pea.

**Tatalo:** Le Ali'i e, fa'afetai ona e ofoofogia lou alofa ma lou tausiga i lau foafoaga, ma e te fa'amaoni pea i ai. **Amene.**

**Aso Gafua – Iulai 17: “Agalelei” (Kindness)**

**Tusi Faitau – Salamo 145:13-21**

**Matua – f.17:** *“E amiotonu le Ali’i i ona ala uma; o lo’o alofa ia i ana mea uma lava na faia.”*

O se tasi o autu o le a fa’agasolo i lenei vaiaso e fa’apea, o le amiotonu po o le fa’amasinoga tonu a le Atua, o lona fa’amaoni lava lea i lana feagaiga, e le gata ia Isaraelu, a o tagata uma ma mea uma na ia faia. O le agalelei, o le va’ava’ai lea i ni auala e mafai ona fesoasoani atu ai i le atiina a’e o isi tagata; e le na o le amio lelei e fa’aali atu i ai - atonu e agalelei fo’i le ta’u atu i se tasi ni a latou amioga ua leaga i le silasila. Ma, ina ia mafai ona agalelei se tasi, e tataua ona tatou matauina isi tagata ma taumafai ona tali atu i ni a latou mana’oga, tusa lava pe itiiti. Ua fa’aailoa mai e le fai Salamo, e fa’apea le agalelei o le Atua. “E tausi le Ali’i i e alolofa atu ia te ia uma lava” (f. 20). O lo’o silasila mai pea le Ali’i ia i tatou ma me aua faia e atia’e ai i tatou; e fesoasoani mai fo’i ina ia avea i tatou ma tagata na foafoaina. O e amio leaga e le manana’o i le agalelei o le Atua, ma e mumusu fo’i e agalelei atu i isi; ma e i’u ai ina fa’aumatia i latou lava.

**Tatalo:** Fa’afetai le Ali’i i lou fa’aali mai ai ia i matou lou agalelei, ma lou Agaga e fa’aali mai ia i matou auala e matou te agalelei atu i isi. **Amene.**

**Aso Lua – Iulai 18: “O le fa’ailoga o le fa’amaoni o le Atua”**

**Tusi Faitau – Isaia 42:1-9 (The sign of God’s faithfulness)**

**Matua – f.6:** *“Na ou vala’auina oe i le amiotonu; ou te taofimauina lou lima, ma a’u leoleo ia te oe, ou te avatua fo’i oe e fai ma feagaiga a le nu’u, o le malamalama o nu’u ese.”*

O ai o lo’o talanoa i ai le perofeta o Isaia? O ai lenei ‘au’auna a le Atua? O le nu’u o Isaraelu, o e ua vala’auina e le Atua e fai ma malamalama mo nu’u ese, e fa’asoa atu ai la latou feagaiga ma le Atua i le lalolagi - ae le o faia lava fa’apea? Pe le o va’aia ea e Isaia se tagata, o se perofeta tulaga ese o le a ola i so’otaga fa’apitoa lea o lo’o finagalo i ai le Atua e maua e tagata uma na ia foafoaina? Mo Kerisiano, o lenei valo’aga a Isaia e taunu’u ia Iesu. E foliga mai o lo’o fa’amatala mai e le faitauga o lenei aso le soifuaga ma le galuega a Iesu - e fa’aailoa atu ai ia i latou uma e le iloa lelei le ola ua vala’auina ai i latou e le Atua, e fa’asa’oloto ai fo’i e o lo’o nonofo i le pogisa ona o le fefe ma e fo’i o mafatia i le agasala. O lenei ‘au’auna ua vala’auina e le Atua i le amiotonu (f.6) - o ia o le fa’ailoga o le fa’amaoni o le Atua i lana foafoaga ma lana feagaiga. E leai se mea e mafai ona taofia Iesu - “E le mu itiiti o ia, e le gapepe fo’i o ia” (f.4); e o’o lava i le maliu tiga i luga o le satauro e le mafaia ona taofia lona alofa fa’amaoni i tagata o le Atua. O fa’atusa uma o le satauro e fa’aailoa mai ai ia i tatou le tele o le alofa o le Atua, ma le mamao fo’i o le mea e o’o i ai lona fa’amaoni. Ua vala’auina i tatou e ‘auai fa’atasi i le galuega o le fa’aalia o le alofa i isi tagata.

**Tatalo:** Le Atua e, ia e faia a'u o se tasi o au 'au'auna, ina ia pei ai a'u o Iesu i le fa'aalia o lou alofa fa'amaoni i isi. **Amene.**

**Aso Lulu – Iulai 19: “Pa’uu ese ma toe fo’i mai”**

**Tusi Faitau – Auega 3:22-33** (*Falling away and returning*)

**Matua – f.32:** “Aua e ui lava ina fa’atiga mai o ia, e toe alofa mutimuti vale mai o ia e tusa ma le tele o lona alofa.”

O le tusi o Auega na tusia i le taimi o se tasi o mala silisili o Ierusalem, o lona to’ilalo ia Papelonia, lea sa ta’ita’i atu ai le to’atele o tagatanu’u fa’atasi ai ma le tupu ma ave fa’apagota i Papelonia i le tausaga e 597 TLM. O lea mala o se mea na mafaia ona ‘alofia, a ua tatau fo’i mo le nu’u o Isaraelu. Ua latou le tausia lo latou itu o le feagaiga ma le Atua; ua latou amio e pei o nu’u ese. Ua latou feoa’i solo ma feagai ma nisi o nu’u malolosi sa si’omia ai i latou, ma ua latou le fa’alogo i mea ua fetalai mai ai le Atua ia te i latou.

O le mataupu e 3 ua fa’ailoa mai ai ua fa’atagaina e le Atua o faigata ia ua o’o mai ia Ierusalem - ae o se fa’ailoga fo’i e iloa ai o le i’uga lea o le fa’amaoni o le Atua i lana feagaiga ma ona tagata. E sili ona lelei Isaraelu pe a latou ola ma tausia le latou itu o le feagaiga ma le Atua. A latou le tausia le feagaiga ma uia o ‘auala sese, e le mafai ona e le Atua ona tu’u faapea latou.

A o le isi itu, e fa’atalitali fo’i le Atua i le taimi e iloa ai e ona tagata le sese ma toe liliu atu ai ia te ia, ina ia fa’aalia ai lona alofa mutimutivale e fesoasoani ai ina ia latou toe savalia le ala sa’o. O le tele o taimi tatou te mafatia ai ona ua tatou faia filifiliga sese e mamao ai tatou ma le Atua. A o le fa’amaoni o le Atua e le uma lea. A tatou liliu atu ia te ia e fesoasoani ia ina ia tatou iloa mea ua tatou sese ai, ma e foa’i mai e ia le alofa ma le malosi tatou te faia ai mea e sili atu.

**Tatalo:** Faafetai le Alii e, a o’o ina ou tautevateva ma pa’u i filifiliga sese, o oe lava e fa’atali e fa’atu a’u toe fa’atonu a’u i le ala sa’o. **Amene.**

**Aso Tofi – Iulai 20: “Vala’auina i le mafutaga”** (*Called into fellowship*)

**Tusi Faitau – 1 Korinito 1:4-9**

**Matua – f.9:** “E fa’amaoni le Atua, o le ua vala’auina outou ina ia mafuta fa’atasi ma lona Alo o Iesu Keriso lo tatou Ali’i.”

E fa’amaoni le Atua i lana feagaiga ma lana foafoaga - ae le fa’apea la o le a ia sauaina ai i tatou, pe fa’amalosia i tatou e tausia lo tatou itu o le feagaiga. E silafia lelei e le Atua uiga o le tagata: aua fo’i na o’o Iesu i fa’aosoosoga ma na ia o’o fo’i i le tiga o le satauro. Ae le o naunau le Atua ina ia tigaina ma tauivi le tagata e aunoa ma se fesoasoani. O le tagata lava ia e fegalegalea’i ma isi tagata: e na te talia le fesoasoani a isi, ma e fesoasoani atu fo’i i isi tagata pe a mo’omia.

Ua vala’auina i tatou e le Atua ina ia sa’ili atu le uiga moni o le avea ma tagata – o le fa’ataua o mafutaga. O le mafutaga ma Iesu, e a’oa’oina ai i tatou ina ia ola e pei ona soifua ai o ia; ma mafuta fo’i ma isi tagata e pei ona

ia faia. I lona soifua, maliu, ma le toetu, na olaina e Iesu le fa'amaoni o le Atua; na fa'aioa mai ai e leai se mea e mafai ona taofia le alofa o le Atua i lana foafoaga. E ui lava i le to'ilalalo, o le faia o fa'ai'uga sese, ma le tu'inanau o le tagata e faia tulafono i le mafutaga ma le Atua, o le galuega lea a le Ekalesia le mafutaga a Iesu Keriso ua vala'auina e fai. A va'ava'ai tagata i le Ekalesia, pe o se fa'alapotopotoga tele i le lalolagi atoa, po o le fa'apotopotoina o ni nai tagata i totonu o le lotoifale, o le mea e tatau ona latou va'ai i ai: o le alofa o le Atua ua foa'iina fua mai ma le fa'amaoni i mea uma ma tagata uma na ia faia. Ina ia faia lona mea, e mana'omia e i tatou le alofa ma le lagolagosua fa'atasi i totonu o mafutaga.

**Tatalo:** Fa'afetai ona o le matou mafutaga ma Iesu fa'apea ma isi tagata. Ia matou fa'amaoni ia i latou, e pei o lou fa'amaoni mai ia i matou. **Amene.**

**Aso Faraile – Iulai 21: “O le Atua o le Atua lava”** (*God being God*)

**Tusi Faitau – 2 Timoteo 2:11-13**

**Matua – f.13b:** “*E fa'amaoni pea lava ia – aua e le mafaia e ia ona fa'afiti ia te ia.*”

Atonu tatou te le o nofouta i ai, ae tofua uma tagata ma uiga e iloa ai lona ituaiga tagata. Mo nisi, atonu latou te fiafia i musika, o isi e alolofa tele i o latou aiga, e mafai fo'i ona i ai uiga e u'una'ia ai le tagata e faia mea sese e pei o le mana'o pe naunau i tupu po o le tamaoiga. Po o le a lava uiga o lo'o ia i tatou, o ia uiga e fa'atonuina mai ai a tatou amioga ma filifiliga fai.

O le faitauga mo lenei aso ua fa'amanatu mai ai ia i tatou, o le fa'amaoni, o le uiga tumau lea o le Atua. Afai tatou te fa'amaoni i le tatou mafutaga ma le Atua, e manatua fo'i e ia tatou i lana fuafuaga mo le foafoaga atoa. E avea ai tatou ma tagatanu'u o le malo o le Atua, e galulue fa'atasi ma ia, e fa'amaoni fa'atasi fo'i ma ia. E oti o tatou tagata tuai e le fa'atuatua, ina ia tatou iloa le ola moni na ia faia ai i tatou; e onosa'ia puapuaga o lenei lalolagi ina ia maua ai e i tatou le avanoa i le fuafuaga e fa'avavau a le Atua mo lana lalolagi. O lo'o ia tatou le sa'olotoga e fa'afiti atu ai i le Atua, e te'ena ai le ola ua ia ofoina mai ia i tatou, ma e na te le fa'amalosia fo'i i tatou e tali atu i lona fa'amaoni. Ae e tumau pea lona fa'amaoni, lona alofa mai ia i tatou, ma e fa'aali mai pea e ia le olaga tatou te maua pe a mulimuli atu ma talia o ia.

**Tatalo:** Fa'afetai le Ali'i e, e leai se mea e taofia le ituaiga Atua o lo'o i ai oe, o le Atua alofa ma le fa'amaoni. **Amene.**

**Aso Toona'i – Iulai 22: “Na te faia lava lenei mea”** (*He will do this*)

**Tusi Faitau – 1 Tesalonia 5:23-24**

**Matua – f.24:** “*E fa'amaoni lava o le ua vala'auina outou, o le na te faia lava.*”

A ou malaga i le pasi, ou te taumafai e tulituli le nofoa pito i luma, ona e tele le avanoa. A o nei nofoa, e masani ona nonofo ai fanau laiti ma o latou matua, ma ou te fiafia e fa'alogologo ma va'ava'ai i fegalegalea'iga i le va o

matua ma o latou fanau. O isi taimi e talanoa atu fanau, ae fai lava le telefoni o matua. O isi taimi o fanau e fai telefoni, ae nofonono matua. Ma o isi fo'i taimi, e fa'alogoata fanau ma fiu ai matua. E iai fo'i taimi e va'ai ma fa'alogo atu o lo'o mafuta fiasia ma talatalanoa fanau ma matua i luga o le pasi.

O le mea e fa'afetai ai, ona e le pei le Atua o matua i le lalolagi nei. Tatou te le tigaina e saili lona alofa e ala i amiolelei ma le faia o mea e na te fai mai ai ia i tatou. O le galulue fa'atasi ma ia, o se tali atu lea i lona fa'amaoni ma lona alofa e tumau, lea na tu'uina mai ia i tatou i le taimi a o tatou le iloa o ia. E le mafai ona fai mai le Atua ia i tatou, "Afai tou te le faia le mea ou te finagalo i ai, o le a ou le toe alofa ia te outou". Nai lo'o lea, e na te vala'auina i tatou e mafuta fa'atasi ma ia. E na te fa'atagaina fo'i i tatou e tali atu pe afai ua tatou sauni e sui ma a'oa'oina fo'i i tatou i ona ala. E fa'amaoni lava o ia, ma e na te faia ia mea uma.

**Tatalo:** Le Ali'i e le alofa e, e te le tu'ulafoa'i ia te a'u. O lou alofa fa'amaoni, o lau meaalofoa lea ia te a'u. Fa'afetai. **Amene.**

## FA'AMAONI – FAITHFULNESS

### 2 - Tagata fa'amaoni, ola fa'amaoni (*Faithful people, faithful living*)

**Aso Sā – Iulai 23:** “Fa’atalitali fa’amaoni” (*Faithful waiting*)

**Tusi Faitau – Luka 2:26-38**

**Matua – f.36-38:** “*Ana...sa la nonofo ma lana tane i tausaga e fitu talu ina o taupou, a ua oti lana tane; o ona tausaga ua tusa ma le valugafulu ma le fa...O lea lava itu aso, ua sau ai o ia, ua fa'afetai atu i le Atua, ma tautala ia te ia i tagata uma lava e na fa'atali atu i le togiola i Ierusalem.*”

O le autu o le vaiaso ua tuana'i o le fa'amaoni o le Atua. A o le autu o lenei vaiaso, o le tali atu o le tagata - po o le tatou fa'amaoni i le Atua. Pe fa'apefea ea ona ta'ita'i atu tagata i se olaga fa'amaoni ma le auuuna atu e ala i le fa'alagolago i le Atua?

O lenei aso o le a tatou tilotilo i le tala ia Ana, ma lona fa'atalitali fa'amaoni. O le matua i tausaga e a'oa'oina ai le tagata i ni uiga lelei e tele - o le onosa'i, o le potu, o le mea moni, ma le filemu. Ae le o taimi uma o taimi lelei. A fa'asolo tausaga e mafai ona tatou toe tepa i tua, ae atonu e sili atu ona faigata le va'ai i le lumana'i. Ae peita'i, o Ana ma Simeona o ni tagata na soifua ma le fa'amoemoe. Na la mo'omo'o mo “le fa'amafanafanaga o Isaraelu” (f. 25), “le Keriso o le Ali'i” (f.26), ma “le togiola o Ierusalem” (f.38). Na la fa'amoemoe e pa'i mai le Atua i le lalolagi i se lelei fou, ma na la fa'atalitali ma le fa'atuatua ma tatalo ma ia mea i le mafaufau. Mai i le la nu'u, i le tali mai i le la tatalo, o le a tafa mai ata o le malamalama ma le folafolaga. Ua iloa e Ana ona nofo to'atasi - pe a ma le onosefulu tausaga na ia nofo ai na o ia. Ae na ia maua le tausiga ma le malosai mai le Atua. E le'i fa'aititiia lona fa'atuatua a o fa'asolo tausaga, ae na fa'ateleina ma a'apa atu i le malamala-



lama. Ina ua ia va'ai atu i le pepe fou ua ta'ua o le Mesia, na fa'aosofia lona loto i le vi'iga ma le fiafia. Na ia mana'o e ta'u atu i tagata uma le mea ua faia e le Atua. Aua ua liutino tagata le Atua, ua fa'ataunu'u le folafolaga a le Atua ma ua tali talosaga a Ana. Ua fa'amanatu mai e Ana ia i tatou, o le taimi e fa'atalitali ai e le o se taimi fa'ama'imaui. E maua fo'i le Atua i le fa'atalitali, ma e iloa le alofa tunoa i tafa'ilagi. O le to'atele o i tatou, o le a i ai taimi e tatau ai ona tatou manatua lea mea.

**Tatalo:** Ia manatua tagata o lo'o fa'atali. Ia latou iloa e tu'u atu e le Atua le fa'amoemoe fou. **Amene.**

**Aso Gafua – Iulai 24: “Fa’atinoga fa’amaoni”** (*Faithful dealing*)

**Tusi Faitau – Luka 16:10-13**

**Matua – f.10, 11, 13:** *“O le fa’amaoni i le mea itiiti, e fa’amaoni fo’i o ia i mea e tele...Afa’i la tou te le’i fa’amaoni i le ‘oa o le amioletonu, o ai se na te tu’u atu ia te outou le ‘oa moni e tausi?...E le mafai se ‘au’auna ona ‘au’auna i ali’i e to’alua...Tou te le mafaia ona ‘au’auna i le Atua atoa ma le ‘oa.”*

O le ta'ua o le auauna pule amioletonu (Luka 16:1-9), o se tasi lea o fa'ataoto faigata a Iesu, ae sosoo ane ai ma le tusi faitau mo lenei aso. E i ai le manatu e fa'apea, o le tausimea o tupe e fa'atusa i se fuafiva, e fua ai le soifua maloloina ma le manuia o le olaga fa'aleagaga o se tagata. O le fuaiupu e 10 e amata i le fa'atuatuaina. O se tagata e faia le mea tonu ma le fa'aeteete i mea laiti, e mafai ona fa'atuatuaina i mea e tele. Tatou te fa'aaogaina ea le tamaoiga ua tatou maua i se auala e fa'amamaluina ai le pule moni, o le Atua? Pe ua tatou fa'aaogaina ea ma le fa'atuatuaina? Afa'i tatou te mafaia, o le a tatou mauaina le 'oa e sili mamao atu nai lo'o oloa fa'aletino.

O le ta'ua o le “oa o le amioletonu” i le fuaiupu 11, e fa'amanatu mai ai o tupe e taufa'asese. E folafola mai ai mea e sili atu nai lo'o mea e tu'uina atu. Aitalafu taugofie, tupe teu, ofo fa'apitoa, ma totogi faigofie - o ni fa'aupuga e matagofie tele. Peita'i, e le o taimi uma e sa'o ai mea ua fai mai ai. O le upu 'oa i fuaiupu e 11 ma le 13 e uiga ese. O le upu o le “*mammon*” i le gagana Eperu, o lona uiga, o “mea ua fa'atuatuaina e tagata”. E foliga mai o tupe e matua'i fa'atuatuaina lava, ae afa'i tatou te fa'alagolago ma fa'amoemoe i ai, ua sese le tatou alofa ma le tatou fa'amaoni. O le Atua ma le “*mammon*” e feaiga'i. O le fa'aaoga tatau o le tupe e mafai ai ona tautua atu ai i le Atua, ma fesoasoani ai i tua'oi. Ae na o le Atua lava e tatau ai le tatou ta'utinoga ma le tatou fa'atuatua.

**Tatalo:** Ia ta'ita'ia e le Atua mea tatou te faia i mea ua tatou maua, aua o mea uma lava o mea a le Atua. I le suafa o Iesu. **Amene.**

**Aso Lua – Iulai 25: “O sui fa’amaoni”** (*Faithful representatives*)

**Tusi Faitau – 2 Korinito 5:17-6:10**

**Matua – m.5 f.20; m.6 f.8-10:** *“O lenei, o savali i matou a Keriso, peiseai ua 'aioi mai le Atua ia te outou e ala ia i matou...O i matou ua peiseai o e*

*fa'asese, a e fa'amaoni lava...peiseai a oti, fa'auta fo'i, o lo'o ola i matou... peiseai o fa'a-noanoa, a o lo'o olioli pea; peiseai o matitiva; a ua matou fa'atamaoaigaina nisi e to'atele; peiseai e leai sina mea o ia te i matou, a o lo'o ia te i matou mea uma."*

O le sāvali i aso anamua e ese ma le taua, aua e i ai le fe'au taua e fia momoli - o le nofoaga e asiasi i ai, o tagata e talanoa i ai, ma le fe'au e tau-logologo atu. O Kerisiano fo'i o savali. Tatou te tautala mo Keriso i le lalolagi o lo'o itiiti le malamalama i lona alofa ma le talalelei. E taua la tagata e fai ma ona savali. Pe iloa ea e tagata le ituaiga tagata na i ai Iesu, pe a latou va'ava'ai mai ia tatou? E fa'aapefa ona fai tatou ma sui o le Ali'i na fa'asatauroina ma toetu?

O le tatou faitauga mo lenei aso o lo'o fautua mai ai o le satauro ma le toetu, o puapuaga ma le malosi, o le a o fa'atasi pe a tatou faia le galuega a Keriso. Atonu e ita mai isi, ae fa'aaloalo mai isi, ona o le tatou galuega. Ma, atonu fo'i tatou te amo fa'atasi fo'i mafatiaga o isi tagata, ma fa'asoa atu fo'i le maotino ma le lototele i auala tatou te lei iloa. A fa'apea e le maua e i tatou le manuia, tatou te maua le avanoa e auaua ma agalelei ai; o le a tele pea mea e mafai ona tatou fa'asoa atu.

**Tatalo:** Le Alii e, a'oa'o mai i matou e auaua atu ia te oe, **Amene.**

**Aso Lulu – Iulai 26: “Tiga fa’amaoni”** (*Faithful suffering*)

**Tusi Faitau – Fa’aaliga 7:13-17**

**Matua – f.14, 15, 17:** *“Ona ou fa’apea atu ai lea ia te ia...’O i latou ia o e o mai nai le puapuaga tele, ua ta fo’i o latou ofu, ma ua fa’asinasinaina o latou ofu i le toto e le Tama’i mamoe. O le mea lea ua latou i luma ai o le nofoali’i o le Atua...Aua o le Tama’i Mamoe...na te fafaga ia i latou, ma ta’ita’i ia te i latou...e soloieseina fo’i e le Atua o loimata uma nai o latou mata.’”*

Mo le to’atele o Kerisiano i le lalolagi, o sauaga o se mea moni o le olaga. E tusa lava pe fa’aitiitia mo sina taimi, e tumau pea i le mafaufau. E fa’asolo atu le maufetu’una’i i augatupulaga. E manatua i latou na maliliu fa’amaturo ona o le fa’atuatua. Mo le to’atele o a tatou uso ia Keriso, o se vaega moni lava lea o le avea ai ma tagata fa’atuatua o le Ekalesia.

O le tusi o Fa’aaliga na tusia mai se si’osi’omaga fa’apea. Na mo’omia e le ‘aufaitau o lea tusi a Ioane ona manatunatu i mafatiaga. O Kerisiano i lea vaitau sa to’aitiiti lava, ma o tagata sa masalosalo. O le sa’olotoga ma le ola o tagata Kerisiano, sa tu’ufesili lava. E pei lava o taimi e tula’i mai ai sauaga, e te le iloa poo afea, ae poo ai fo’i e auala mai ai. O le faitauga mo lenei aso, o lo’o fa’aalia mai ai, o le Ekalesia Kerisiano i le lalolagi atoa, o tagata maturo. O sauaga o se puapuaga tele e fa’asoa fa’atasi ai. O i tatou ua fa’amamaina i le toto o le tama’i mamoe. Na puapuagatia o ia mo i tatou, ma e tatau fo’i ona nofosauni i tatou e puapupagatia ona o lona suafa. O Kerisiano o tagata o le fa’amoemoe. O le Keriso o le satauro, o le Ali’i lava lea o le Eseta. A fa’apea ua tatou tau’ave fa’atasi o ana fa’anoonaga, e na te le tu’ulafoa’i i tatou e tagi.

**Tatalo:** E manatua nisi o atunu'u o lo'o sauaina ai tagata Kerisiano. Ia foa'i atu ia i latou le lototele, mautinoa, potou, ma le onosa'i. **Amene.**

**Aso Tofi – Iulai 27: “Perofeta fa’amaoni”** (*Faithful prophets*)

**Tusi Faitau – Galuega 21:7-14**

**Matua – f.7-9:** *“Ua matou o mai i Turo ua o’o i Tolumai...O le taeao ua o atu ai i matou, ua o’o i Kaisareia; ua matou ulu atu i le fale o Filipino le folafola le tala lelei, o le tasi o ia o le to’afitu, ua matou nonofo fo’i ia te ia. Sa i lenei tagata afafine e to’afa, o taupou, o e perofeta ane.”*

O Kaisareia o se ‘aai matagofie i le talafatai o le Nu’u Pa’ia. O lea ‘aai na toe fau ma faaleleia e Herota i tausaga a o le’i fanau mai Iesu. I le vaitau o le tatou faitauga, i tausaga 50 TA, sa nofo ai le kovana Roma ma lana ‘autau e toatele. Sa tu ai foi le malumalu Roma; o se nofoaga lelei e fa’afailele ai le fa’atuatuaga Kerisiano.

O Kaisareia sa fa’amautu ai Filipino le faievagelia. O le mataupu e 8 o le tusi o Galeuga, tatou te iloa ai o Filipino na i ai le meaalofo e fa’asoa atu ai le talalelei i tagata ese. A o lenei, ina ua mavae tausaga e 20, ua tu’ufasolo mai e Filipino le galuega i ona afafine e to’afa e le’i fa’aipoipo, ua i ai le meaalofo o valo’aga. Ua latou savalia le ala faigata o le avea ai ma so’o o Iesu.

E tusa ai ma fa’amatalaga a le tusitala o Eusebius, sa tele lava le sao o nei fafine i le galuega tala’i. Fai mai na latou malaga atu i le atunu’u o Take, ma, ina ua maliliu, na fa’amamaluina o latou tu’ugamau e tagata Kerisiano i le tele o tausaga. O a’afiaga na feagai ma i latou i Kaisareia na fa’aaupiga ai i latou e tumau i le ola fa’a Kerisiano i totonu o si’osi’omaga fou, aemaise le tau aveina o le fa’aaloalo ma tiute fai i le Ekalesia. E ui lava sa liliu ese Kaisareia mai i le Atua, ae na mafai e Kerisiano i lea ‘a’ai ona fa’amalosia i le isi ‘augatupulaga, o lea na fua mai ai galuega lelei i le tele o tausaga.

**Tatalo:** Matou te tatalo mo tupulaga Kerisiano ua e iloa ma silafia o lo’o feagai ma lu’itau i o latou malaga fa’a Kerisiano. **Amene.**

**Aso Faraile – Iulai 28: “Fa’amaoni ma le fua tele mai”**

**Tusi Faitau – Kalatia 5:13-23** (*Faithful and fruitful*)

**Matua – f.13, 16, 17, 22, 23:** *“Ua vala’auina outou i le sa’olotoga...ia outou savavali i la le Agaga, ona le faia lea e outou o le tu’inanau o le tino. Aua o le tino ua tu’inanau lea e tete’e atu i le Agaga...A o le fua o le Agaga o le alofa, o le olioli, o le filemu, o le onosa’i, o le mataalofo, o le agalelei, o le fa’amaoni, o le agamalu, ma le amio mama.”*

O le sa’olotoga, o le tino, ma fua o le Agaga – o mea ia e mafua ai le ola fa’amaoni. O le sa’olotoga, i le tusi o Kalatia, o lona uiga o Kerisiano mai nu’u ese e sa’oloto lava i latou i lo latou tulaga o tagata nu’u ese. E savavali fa’atasi Iesu ma i latou i totonu o lo latou aganu’u ma tu masani ua latou iloa. E le mana’omia e i latou ona fa’aaogaina pe savalia tulafono o tagata luitaia. A o le sa’olotoga e aofia ai fo’i ma tiute, e faia ai filifiliga lelei e uiga i amioga

ma le olaga. Mo tagata Kerisiano, o lenei sa'olotoga e ono a'afia ai i tatou i feteenaiga i le va o le tino ma le Agaga. O le tino, o le ola o le tagata e va'aia - o meaalofa ma mana'oga, mafutaga ma fuafuaga - e leai se afuaga loloto, e leai se va'aiga lautele, ma e leai fo'i se avanoa mo Keriso. Afai ae pule le tino, e mautinoa lava le faia o filifiliga sese i se taimi, ma tuputupu a'e ai le manatu fa'apito. O le uiga lea o "tu'inanau o le tino" lea e ta'ua i le faitauga.

A o le Agaga Paia e naunau e u'una'ia i tatou mai totonu, ma e ta'ita'iina i tatou i tulagavae o Iesu. Ona tupu ai lea o fua - "fua o le Agaga" (f.22) - e fa'asolosolo malie, e mausali, ma e faifai pea. A o'o ina i ai se fete'ena'iga, o fea le itu tatou te o i ai - tino po o le Agaga; mana'oga po o fua o le Agaga; o le tagata po o Keriso?

**Tatalo:** Iesu Keriso, fesoasoani mai ia te a'u ina ia ou fa'alagolago ma mulimuli i le ta'ita'iga a le Agaga Paia. **Amene.**

**Aso Toona'i – Iulai 29: "Fa'apopotoga fa'amaoni"** (*Faithful community*)

**Tusi Faitau – 1 Tesalonia 1**

**Matua – f.2-3:** "*Matou te fa'afetai pea lava i le Atua, ona o outou uma lava, o lo'o ta'uta'ua outou i a matou tatalo, e le aunoa ona matou manatua i luma o le Atua o lo tatou Tama lea, la outou galuega i le fa'atuatua, ma le fa'amalosi i le alofa, ma le tumau pea i le fa'amoemoe i lo tatou Ali'i o Iesu Keriso.*"

E atagia mai i le tatou faitau, o lenei tusi na tusia i le loto e tumu i le alofa mafana, atoa ai ma ni a'oa'oga mo le 'au fa'atuatua fou. O le amataga lava o lenei tusi e maua ai le leo o lo'o tusia ai lenei tusi: "Fa'afetai pea lava...ona o outou uma lava...e le aunoa ona matou manatua" (f.2). O ia upu o lo'o aumai i le leo malosi ma o lo'o fa'amamafa mai ai le taua o le mataupu a le tusitala.

Sa latou galulue malosi i le tala'iina o le talalelei, ma la latou ta'utinoga na sau mai le loto e fia avea ma 'au'auna; sa latou popole fo'i mo le manuia o a latou uso i le galuega tala'i. Sa fa'aalia fo'i e le Ekalesia i Tesalonia lea loto taumafai, i le talitonuga ma le ola fa'a Kerisiano. O lo'o ta'ua i le faitauga le, "Galuega i le fa'atuatua, ma le fa'amalosi i le alofa, ma le tumau pea i le fa'amoemoe" (f.3). E foliga mai o lo latou fa'atuatua e taula'i ia Iesu na fa'asa-tauroina ma toetu mai le oti ma le tu'ugamau. O le alofa e le fa'atua'oia, e fesoasoani ma le alofa i le lua te tua'oi. E tulimata'i le fa'amoemoe o le atoaga o le galuega a le Atua i le lalolagi.

O le fa'atuatua, o le alofa, ma le fa'amoemoe e saunia ma tapenaina ai le tagata mo lenei olaga. A o ia upu e tolu o lo'o tu'ufa'atasia ma se isi upu e atagia atili ai le uiga. "Galuega i le fa'atuatua" - o le fa'atuatua ia Iesu o se uiga malosi; e atagia i uiga ma amioga. "Fa'amalosi i le alofa" - o lo'o tautala i le loto alofa e tau'ave ai tiga ona o le fesoasoani atu i isi tagata. "Tumau pea i le fa'amoemoe" - o lo'o ta'u mai ai le tumau ma le mausali. O Tesalonia o se Ekalesia ma se nofoaga lelei e fa'ai'u ai le tatou vaiaso i le Fa'amaoni.

**Tatalo:** Tatalo atu mo i latou o lo'o feagai ma tauiviga i le fa'atuatua, mo i latou e le o maua le alofa, ma i latou ua leai ni fa'amoemoe. **Amene.**

## FA'AMAONI – FAITHFULNESS

### 3 - Tagata o le fa'atuatua (People of faith)

**Aso Sā – Iulai 30: “Iosefa, ua tu’uina atu i ai le malosi tele”**

**Tusi Faitau – Kenese 41:33-46** (*Joseph, entrusted with great power*)

**Matua – f.33:** “*O lenei, ia sa’ili e Farao se tagata mafaufau ma le poto, ma ia tofia o ia e pule i le nu’u o Aikupito.*”

Ta’ueseā, tu’ulafoa’iina, fa’atau atu fa’a pologa, tu’ua’ia ia tu’ua’iga sese, ma le ave fa’apagota i le falepuipui; e le o ni tulaga ia e fa’atupuina ai le fa’amaoni i le Atua. O le lagona lea o le leai o se fa’amoemoe o se tulaga e sili ona taua, aua e mafai ona maua ai e le tagata le masalosalo fa’apea ma le fesiligia o latou mafauauga. Atonu e leai se isi o lo’o faitau i le tala ia Iosefa e faitio pe ana fa’aalia e Iosefa le leai o se fa’atuatua i le Atua ona o faigata ua ia o’o i ai. Ae peita’i, o le avanoa na ia maua e fa’amatalaina ai le miti a Farao o se fa’atinoga lea o lona fa’atuatua, ina ia fa’aali mai e le Atua le uiga o miti a Farao. Na taunu’u le folafolaga a le Atua i le taimi lava na fa’amoemoe ai Iosefa i le mea e na te le iloa. Sa tumau le fa’amaoni o le Atua e tusa lava fo’i pe ana mou le fa’atuatua o Iosefa. Ona o le fa’amaoni o le Atua e le fa’alagolago lea i le fa’amaoni atu o se tagata ia te ia. O le fa’atuatua o Iosefa i le Atua ma lana fa’amaoni ia te ia, na ave’esea ai o ia mai i le falepuipui ae ave i le maota o Farao; o le tautua i le tautuaina; o le vaivai i le malosi tele. Pe a fa’aalia mai e le Atua lana fa’aaliga mo lou olaga, e te le mafaia ona e ausia pe fa’ataunu’uina. Peita’i o le fa’amaoni i le Atua, e ui lava i faigata e le ma’alofia, e na ta ta’ita’iina ai i tatou i ala e sili ona lelei mo o tatou olaga.

**Tatalo:** Fa’afetai Tama mo mea ofoofogia uma ua e fuafuaina mo lo’u olaga. Fesoasoani mai ina ia ou iloa o lou fa’amaoni. **Amene.**

**Aso Gafua – Iulai 31: “Peteru ma Ioane, fa’amaoni i tulaga lamatia”**

**Tusi Faitau – Galuega 4:13-20** (*Peter and John, faithful in danger*)

**Matua – f.19b-20:** “*Pe tonu i luma o le Atua, ona ma fa’alogo ia te outou, a e ma te le fa’alogo i le Atua, ina filifili ia outou. Aua ma te le mafaia ona le tautala i mea ua ma va’ai i ai ma fa’alogo i ai.*”

E mafai ona fa’amatalaina le fa’atuatua o Peteru ma Ioane, o le lototele e fa’alagolago i le Atua, aemaise o le malamalama ma le mautinoa i afioga a le Atua fa’apea fo’i ma folafolaga. O lea lototele ma malamalama na mo’omia ona o tulaga lamatia o le a o’o i ai le la olaga, ina ia la tumau fa’amaoni tusa po o a tulaga mata’utia o le a o’o mai. I le fa’amalosi mai o le Agaga Pa’ia, o la upu e iloa ai le lototele e sili atu i lo’o le lototele fa’aletino, ma e feso’ota’i lea i le la molimauina o galuega a Iesu. Ona o lea tulaga, sa faigata lava ona fesiligia le la molimau i le upu, aua o mea ua la va’aia; na avea fo’i lea ma avanoa e la te fa’aali ai le le fefe, e ui i mea o lo’o fa’atalitali mai ona o le la fa’asinomaga. O le fa’amaoni i tulaga lamatia, e ui lava o se gaioiga lototele, sa mana’omia ina ia tausia a le ‘au’aunaga i le Atua, nai lo’o le tiute

fa'aletagata. O le filifiliga e manino lava, e fa'atusa i taupulega na fa'asaga ia Tanielu, lea sa o'o ai lona ola i se tulaga lamatia i le lua o leona. O le filifiliga e iloa ai le ola ma le oti; le filifiliga i le va o le fa'amaoni i le Atua po o le pule fa'aletagata.

**Tatalo:** Le Ali'i e, ia fa'aalia lo'u fa'atuatua ia te oe e ala i le lototele ma le upumoni. Aumaia le lototele e feagai ai ma faigata e o'o mai. **Amene.**

### **Aso Lua – Aukuso 1: “Fipe, o se tagata e agalelei”**

**Tusi Faitau – Roma 16:1-2** (*Phoebe, a generous benefactor*)

**Matua – f.1-2:** “*Ou te fa'aailoa atu ia te outou lo tatou tuafafine o Fipe...ina ia talia o ia e outou i le Ali'i, fa'apei ona tatau i le 'au paia, ia outou fesoasoani fo'i ia te ia i se mea a outou e aoga ia te ia; aua fo'i e to'atele ua ia fesoasoani i ai, atoa ma a'u nei.*”

O le fa'atomuaga ma le fautuaga a Paulo e fa'atatau ia Fipe i Ekalesia i Roma, e ui e faigofie i tulaga faitauina, o lo'o fa'aalia ma ai se fa'amatalaga e fa'atatau i mea sili atu nai lo'o lona tiute i le tofi tiakono i le galuega. Sa talanoa Paulo e uiga i le agalelei o Fipe ia te ia, fa'apea fo'i ma isi. Atonu o lo'o ta'u mai ai o ia o se tagata mau'oa, ma na ia fesoasoani atu e ala i le foa'iina o tupe i lana Ekalesia i Korinito. Pe na vi'ivi'i ea Fipe ona o lana limafoa'i ma lana loto fesoasoani? Pe mata e lelei ea ona fa'amaonia se tasi i se matafaioi po o se tofi i le Ekalesia ona e mau'oa pe maua tamaoiga e tele?

O le mea e malie ai, o tagata ta'uta'ua ma tagata e tele o tamaoiga e masani ona lalamua pe a sa'ili tofi tetele ma tofi taua, e le po i se lilo o lea fo'i la ua maua i totonu o nisi Ekalesia. Ua i'u ai ona le amana'iaina ai isi i tofi taua ona o lea tulaga. O le fautuaga e fa'atatau ia Fipe e fa'avae lea i le fa'amaoni o ia ma lana soifua 'au'auna, nai lo'o le tele o le tamaoiga. Na ia foa'i atu o lona taimi ma le tomai fa'aleta'ita'i. Na ia limafoa'i e ala i lana tali atu i mana'oga o tagata uma, ma na fa'aalia lona fa'atuatua ma lona alofa i ana fa'atinoga. O ia o se tagata agalelei e le'i taumafai e sai'li se tau, ma na ia fa'atuatuaana'i o ona lava mana'oga. O uiga ia o Fipe e maua ai le a'oa'oga mo i tatou, e ala lea i le sa'ilia o le ala tatou te 'au'auna ai i le Ekalesia fa'apea tagata lautele.

**Tatalo:** Le Atua alofa e, fa'afetai ona o avanoa e foa'i atu ai lo'u taimi ma meaalofo ina ia fa'atamaoigaina ai isi i le fa'atuatua. **Amene.**

### **Aso Lulu – Aukuso 2: “Sila, o se soa fa'amaoni”**

**Tusi Faitau – Galuega 16:19-31** (*Silas, a faithful companion*)

**Matua – f.25:** “*O le tulua o po ma ao, ua tatalo ai ma pepese o Paulo ma Sila i le Atua; ua fa'alogofa'i ia te i la'ua e ua noanoatia.*”

E ui ina lu'itauina Paulo ma Sila i le la malaga fa'amisionare i Europa, e le'i taofia ai i la'ua i le tali o le mana'oga a Paulo ona o se fa'aaliga ia te ia e alu i Maketonia. O le la fa'amaoni i le galuega na i'u ai lava ona tu'uina atu o i la'ua i le falepuipui, i lalo o fa'amasinoga a Roma. Po o le mea ea lea sa

mafaufau Sila e o'o i ai o ia ina ua ia mulumuli ia Paulo? Atonu e leai. Peita'i, na fa'aalia i uiga o Sila le atoatoa o lona loto ma le fa'amaoni ia Paulo, e ui lava i tulaga lamatia. Atonu e iloa e Kerisiano sauaina o faiga le alofa na mafatia ai le 'ausoo ona o le talalelei. O misionare fo'i ua fa'apagotaina i le falepuipui ona o le fa'atuatua, e mafai fo'i ona molimau i ia tulaga.

O le mea atonu e le mafai ona talia e le to'atele, na avea ma avanoa e tapua'i ai Paulo ma Sila. O le la tumau i le fa'atuatua na mafua ai se mafui'e, ma na tupu ai fo'i le vavega na tatalaina ai filifili sa noatia ai i la'ua. Atonu e le'i iloa e Sila tulaga o sauaga o le a ia o'o i ai, a o le mataupu e 17 o Galuega e iloa ai na ia fa'auau pea ma le fa'amaoni i le avea ma soa a Paulo. Atonu e faigofie ona fiu pe a aliali mai o fa'aletonu tuga i le olaga nei, e ave'ese ai i tatou mai le sini o le fa'amoemoe. Ae ui i lea, o le mea moni lava a fa'apea na fa'atasi atu le Atua ia Paulo ma Sila i se tulaga e leai ai se fa'amoemoe, e tatau ona tatou manatua e mafai e le Atua mea e le mafaia e le tagata.

**Tatalo:** Tama alofa e, fa'afetai mo lu'itau o le olaga ua mafai ai ona tupu malosi i le fa'atuatua, ma latalata atili atu ia te oe. **Amene.**

**Aso Tofi – Aukuso 3: “Mareta, o se fa'atuatua e le maluelue”**

**Tusi Faitau – Ioane 11:1-7, 17-27** (*Martha, an unshakeable faith*)

**Matua – f.21-22:** “*Ona fa'apea mai lea o Mareta ia Iesu, 'Le Ali'i e, ana e 'i'inei, po ua le oti lo'u tuagane. A e ui lava i lea, ua ou iloa o mea uma e te fa'atoga atu ai i le Atua, e foa'iina mai e le Atua ia te oe.' ”*

E leai se tasi e mafai ona 'alo pe sola mai le oti. E fa'ate'ia ai, e o'o mai ai lagona tiga, ma e faigata ona talia. O lagona fa'anoanoa ona o le oti e matua loloto lava, ma e fa'aalia mai i lagona o le ita, o le ta'usalaina ma tu'ua'iga e fa'asaga i lou lava tagata. Peita'i, o le loto fa'avauvau e moni lava.

O lagona lava ia na o'o i tuafafine a Lasalo, ae maise o le alaga mafatia a Mareta ia Iesu. E ui lava o ana upu ua fusia i le ita ma faitioga, e pei o le fa'agasologa masani o le loto fa'avauvau, na suia ona lagona mai i tu'ua'iga i le fa'aalia o se fa'atuatua e le maluelue. Sa tatau le fa'aleoina o lona tiga, ina ia fa'aalia ai le loloto o le fa'atuatua, ma e u'una'ia ai fo'i ia i se fa'amoe-moega fou. O sauniga o maliu e masani ona va'aia ai fa'anoanoaga loloto ma loto fa'avauvau, e va'aia ai fo'i le fa'atuatua e mausali. Sa fa'apena fo'i Mareta i ona uiga, ma na suia mai le fa'anoanoa i le fa'atuatua o le a i ai se fa'amoemoe fou. Ae ui i lea, ou te lagona o le fa'aleoina o ona lagona ma lona fa'atuatua o se vala'au atu lea mo se vavega e fa'amalosia atili ai lona fa'atuatua.

**Tatalo:** Le Ali'i e, fesoasoani mai ia ou fa'atuatua i au folafolaga i le taimi nei ma le lumana'i. Ia pupula o'u mata i lou afioga. **Amene.**

**Aso Faraile – Aukuso 4: “Epafara, o se toa e tatalo fa'amaoni”**

**Tusi Faitau – Kolose 4:12-13** (*Epaphras, a faithful prayer warrior*)

**Matua – f.12:** *“O lo’o alofa atu ia te outou o Epafara, o lo outou lava o ia, o le ‘au’auna a Keriso Iesu, o lo’o finafinau e le aunoa i tatalo mo outou, ina ia outou tumau ua tagata matua, ma ua mauintinoa le finagalo uma lava o le Atua.”*

Finafinau i le tatalo! O le ata e o’o mai i lou mafaufau pe a mafaufau i lea upu o le ‘finafinau’, o ta’aloga. So’o se tagata ta’alo lava, e finafinau ina ia malo, ma e o’o lava i lagona tiga pe a to’ilalo. O le finafinau i le tatalo, e pei o le finafinau i ta’aloga. E mataala, e o’o lava i tiga ae naunau lava ina ia manumalo. Ina ua fai mai Paulo o Epafara, “O lo’o finafinau e le aunoa i tatalo” mo le Ekalesia i Kolose. Na fa’aalia ai o ia o se tagata o lo’o fa’amaoni i le fa’atuatua. Ua tumu i mafatiaga, ae musu e to’ilalo. O ia o se toa e tatalo fa’amaoni. A o le a le ‘autu o talosaga ma tatalo a Epafara i le Atua? Na ia mana’o ina ia sili atu ona malosi le mafutaga a le Ekalesia i Kolose ma le Atua. Ae ui i lea, o le tu mausali i le finagalo o le Atua e le faigofie, e pei ona fa’aalia i le tiga o Iesu i lana tatalo i Ketesemane. Aua o tauiviga sili i le tatalo e fa’atotonugalemu i le finagalo o le Atua; o ia fo’i tauiviga e mo’omia ai le toa e fa’amaoni i le fa’atuatua. Po o maua ea ni toa e tatalo fa’amaoni i nei vaitau? O le finafinau i le tatalo e mo’omia ai le onosa’i, o le le fa’avaivai, fa’apea ma le finau malosi. Ua e fiugofie ea i lou olaga tatalo? O lo’o sa’ili pea e le Atua ni toa e tatalo fa’amaoni e pei o Epafara.

**Tatalo:** Le Ali’i e, fesoasoani mai ia ou tumau i lo’u olaga tatalo, ma taula’i atu e o’o lava i le lotolotoi o tauiviga ma tiga. **Amene.**

**Aso Toona’i – Aukuso 5: “Maria, o se so’o fa’amaoni”**

**Tusi Faitau – Ioane 20:11-18** (*Mary, a faithful follower*)

**Matua – f.15:** *“Ua fetalai atu Iesu ia te ia, ‘Funa e, se a le mea e te tagi ai? O ai ea e te sa’ilia?’ A o le fafine, fa te ia o le leoleo ia o le fanua, ua fai mai ia te ia, ‘Le Ali’i e, afai ua e ave ese ia te ia, ta’u mai ia te a’u po o fea le mea ua e tu’uina ai o ia; ona ou ave’eseina lea o ia.’ ”*

O le faitauga mo lenei aso e maua ai le tumutumuga o le ‘autu o lenei vaiaso o le ‘Fa’amaoni: Tagata o le fa’atuatuaga’, fa’atasi ai ma le ta’utinoga a Maria e tumau pea i le aveai ai ma so’o fa’amaoni a Iesu i lona maliu, e pei ona i ai i le amataga o lana galuega i le lalolagi. Ona o lana ta’utinoga, na ia sa’ilia ai Iesu i le tu’ugamau. I fa’amaumauga a le ‘au faievagelia, o lo’o fa’ailoa mai ai le taua o le asiasi atu o fafine i le tu’ugamau. E pei ona tali atu o Maria ina ua fesiligia o ia e le leoleo fanua, o le fa’amaonia lea o lona mana’o e tumau pea i le tulaga o le so’o fa’amaoni e o’o lava i le oti. Ua na ona ia mana’o e sa’ili le tino o Iesu, e fa’aali ai lona alofa ma lona fa’anoanoa i lona maliu. O lona fa’amaoni o lana saofaga lea i lona iloaina ma le feiloa’iga ma Iesu i lana vavega toetu. Na matua fa’ateteleina le fa’atuatua o Maria, e pei o Mareta i le faitauga o le aso Tofi; i le mea atonu e tatau ai ona muta le fa’atuatua, na toe fa’afouina ma maua ai le ola fou. Peita’i, o le aveai ma so’o fa’amaoni atonu e le o se vavega, e pei o le tala ia Maria, ae e mafai ona tutupu vavega. E mafaia ea ona e iloa atu ia mea?



**Tatalo:** Le Ali'i e, ia ou mulimuli ia te oe ma le fa'amaoni. Aumai ia te a'u le loto fa'autauta ma mafauauga e iloa ai lou mana fa'avavega. **Amene.**

**FALETUSI O TUSITUSIGA PA'IA (4) – BIBLICAL LIBRARY**  
**Perofetaga (Prophecy)**

**Aso Sā – Aukuso 6: “O le Atua e faia” (The God who will)**

**Tusi Faitau – Kenese 3:1-15**

**Matua – f.15:** “*Ou te fa'atupuina le feitaga'i ia te oulua ma le fafine, o lau fanau fo'i ma lana fanau; na te tu'imomoina lou ulu, a o oe e te tu'imomoina lona mulivae.*”

A o tatou va'ava'ai i lenei vaiaso i tusitusiga i perofetaga i le Tusi Paia, tatou te amata mai lava i le amataga. O le tala i le fa'aseseina o Eva e le gata e 'ai le fua o le la'au ua fa'asaina e le Atua. Mo le gata, fa'apea ma Atamau ma Eva, e i ai taunu'uga o a latou amioga; ae o ia fo'i taunu'uga e afaina ai le lalolagi atoa fa'apea ma le talafa'asolopito. Ua fa'amatalaina e le Atua, o ia taunu'uga o le a aofia ai ni fa'alavelave e fa'aleagaina ai, o le oti, o le feitaga'i i le va o tane ma fafine, o le va o le tagata ma le Atua, ma le va o le tagata ma le lagi. O se lumana'i e le mafa'agae'etia.

Peita'i, i lea ata mata'utia, o lo'o fa'asusulu mai ai e le Atua le pupula o le malamalama. E ui i le mata'utia o taunu'uga mo le tagata, e le o le tala atoa lea, e le o le i'uga fo'i. Ua folafola mai e le Atua o le a tu'uina le filifiliga sa'oloto ma o latou taunu'uga i le i'uga ua ia faia - o le a i ai se tasi e tupuga mai ia Eva e feagai ma le gata, ma e ui e tigaina ai, a o le a ia manumalo ma fa'ato'ilaloina le gata. E le o se perofetaga e mafai ona tilotilo i ai ma faitaulia aso i lona fa'ataunu'uina. O lona fa'amoemoega, e pei o le tele o perofetaga, ina ia la'ititi le perofetaga, ae ia fa'asino lava uiga o le Atua ma le fa'amalosi'au o lo'o ia aumaia.

**Tatalo:** Le Ali'i e, e tusa lava pe matou te le mautonu i le lumana'i, o lou agalelei e fa'atumauina ma fa'amalosi'au mai mo i matou. **Amene.**

**Aso Gafua – Aukuso 7: “O le Atua e le faia” (The God who won't)**

**Tusi Faitau – Iona 3:1-10**

**Matua – f.4:** “*Ua amata ona ulu atu o Iona i le 'a'ai, o le savaliga o le aso e tasi, na alaga fo'i o ia, ua fa'apea atu, E toe fagafulu po ona fa'aumatia lea o Nineva.*”

O le galuega fa'aperofeta a Iona na faia i Samaria, le laumua o Isaraelu (2 Tupu 14). Ua tatou masani i le tala - na vala'uina Iona e le Atua e alu e fai le galuega fa'aperofeta i Nineva - le laumua o le latou fili o Asuria. Ua inosia Asuria ona o mea ua latou faia i isi nu'u ua latou fa'ato'ilaloina, e aofia ai ma Isaraelu. Na fa'asaua atu e ala i le susunuina o 'a'ai i le afi, ave fa'apagota ona tagata, ma le sauaina o tama'ita'i. Ina ua molimau Iona i ia mea, na mana'o i le fa'amasinoga tonu. Ai ua fiafia Iona i le fe'au a le Atua ua aumai:

“E toe fagafulu po ona fa’aumatia lea o Nineva”. A ua malamalama fo’i Iona, o perofetaga e le o ni folafolaga tumau mo le lumana’i, a o lapata’iga i se mea o le a faia e le Atua, se’i vagana ua suia filifiliga a tagata.

O le mafua’aga o le le fia alu o Iona i Nineva, e le o le fefe nei te’i ua oti ai, a o Iona fefe nei te’i ua le taunu’u le malaia o Nineva. Ma o le mea lava lea ua tupu: na i’u lava ina alu Iona e tala’i atu i Nineva, ua salamo tagata, ma ua le taunu’u ai le faamasinoga a le Atua. Ua atuatuva le loto a Iona, e le pei o le Atua, aua o le alofa mutimutivale ia Iona e le sili lea i le fa’amasinoga tonu. Ua fa’aalia e Iona ni uiga e maua i tagata na sao mai i tiga ma puapuaga, a o lo’o galue le alofa o le Atua mo le fa’amaloloina o Iona a o fa’ataunu’uina Iona vala’auina.

**Tatalo:** Le Ali’i e, fa’afetai ona o lo’o tafe mai lou alofa mutimutivale ia te a’u. Fesoasoani mai ina ia ou alofa atu i e ua fa’atiga mai ia te a’u. **Amene.**

### **Aso Lua – Aukuso 8: “Ua i ai i le Atua” (God has)**

#### **Tusi Faitau – Isaia 9:2-7**

**Matua – f.5-6:** “*Aua o se’evae uma o e ua fa’ase’eina, ua ta’alili i le taua, ma le ofu ua liloia i le toto, e susunuina ia mea, e fai fo’i ma fafie o le afi. Aua ua fanau mai mo i tatou le tama, ua foa’iina mai mo i tatou le atali’i, e i lona ua le malo, e igoa fo’i o ia, o le Silisili ese, o le Faipule, o le Atua malosi, o le Tama o le fa’avavau, o le Ali’i o le filemu.*”

O le faitauga o lenei aso o se perofetaga e tele ona taunuuga. O le perofetaga a Isaia i le tupu o Aasa, o le a fanau mai se atali’i ia te ia o le a toe-fuata’ina ai le tapua’i i le Atua ma le manuia o le nu’u; o le a avea o ia ma tupu sili o Iuta. O lea perofetaga o se lapata’iga ia Aasa ina ia suia ona ala, ma o se fa’amalosi’au fo’i i tagata, o lo’o soifua le Atua. O le ulua’i taunu’uga o lea perofetaga, o le tupu o Esekia. Peita’i, o lo’o i ai fo’i le taunu’uga e sili atu, e le o Esekia, a o le Tupu o Tupu - o le na te faataunu’uina le perofetaga muamua o lenei vaiaso ma manumalo i le gata. E le tataua ona fa’ate’ia i tatou ina ua fa’aaogaina e le Atua le perofetaga e tasi mo fa’amoe-moega e tele; e ui ina ua fa’ataunu’uina, e le tataua ona taofia ai i tatou i le va’ava’ai atu i isi fuafuaga e sili atu o lo’o fa’asino ai fo’i le perofetaga.

**Tatalo:** Le Ali’i e, fa’afetai mo fa’aailoga fa’aperofeta ua e tu’uina mai i tusitusiga paia; fesoasoani ia matou fa’autauta ma talia o perofetaga. **Amene.**

### **Aso Lulu – Aukuso 9: “Oi, o le perofetaga lena!”**

#### **Tusi Faitau – Salamo 22:1-18 (Oh, that was a prophecy!)**

**Matua – f.1-2:** “*Lo’u Atua e, lo’u Atua e, se a ea le mea ua e tu’ulafoa’i mai ai ia te a’u, e taumamao ma lo’u fa’aolataga, o upu fo’i o lo’u fa’ataiao? Lo’u Atua e, ou te vala’au ia te oe I le ao, a e te le fa’afogaina mai; atoa fo’i ma le po, ua ou le mapu lava.*”

E i ai taimi tatou te talanoa ai i upu fa’aperofeta e aunoa ma le iloaina. E fa’apena fo’i i lenei salamo. Na tagi Tavita i le Atua e uiga i faigata ua ia o’o i

ai o ia, a o ia taumafai pea e taofimau i folafolaga na faia e le Atua. Na te lagonaina ua na o ia, ua o'o mai fo'i lagona ua si'osi'omia o ia e i latou na fa'alataina o ia. Ua vaivai le tino, ua mou atu le fa'atuatua, ua motusia le mafutaga, ma ua tu'ulafoa'iina o ia e le Atua. Ma ina ua uma, ua ia tusia i lalo ma fatu fa'a pese ina ia mafai e isi ona fa'aaoga ma iloa, e le na o latou ua o'o i lea tulaga. E i ai tagata ua o'o i ai, ma ola ai fo'i i ia puapuaga ma faigata. Sa leai lava se manatu ia te ia o le a i ai se tasi e na te fa'aaogaina, lilo i manatu o le Atua lava o le a fa'aaogaina lana pese le i totonu o tusitusiga paia.

**Tatalo:** Fa'afetai Iesu ua mafai ona e fa'aaogaina i matou e tautua i lau feau ma lau galuega, **Amene.**

**Aso Tofi – Aukuso 10: “Taulimaina o perofetaga” (Handling prophecy)**

**Tusi Faitau – Ioelu 2:28-32**

**Matua – f.28-29:** *“Mulimuli ane, e i'u ina ou liligi ifo ai lo'u Agaga i luga i tagata uma; ona perofeta ai lea o outou atali'i ma o outou afafine, e fai miti o outou toeaina, e iloa fa'aaliga e o outou taulele'a. Ou te liligi ifo fo'i lo'u Agaga i 'au'auna ma 'au'auna fafine, i ia ona aso.”*

I le Galuega 2, o lo'o fa'aaoga ai e Peteru lenei fuaitau e fa'amatala ai le afio ifo o le Agaga Paia, o le taunu'uga o le perofetaga lea a Ioelu. O le mea e ao ona silafia, e le tutusa faaupuga a Ioelu ma upu sa ta'u e Peteru. E foliga mai, e ui e le o tutusa faaupuga, ae tulituli e Peteru le fe'au ma le agaga o lo'o i tua atu o upu. E le o taumafai Ioelu e fa'atulaga ni tulafono po o ai e mafai ona maua lea manuia ma le ala e maua ai, ae o lo'o ia fatu fa'asolo o upu e fa'amatalaina ai le upmoni matagofie, o le malo fou e mafai ona fa'aaogaina ai e le Atua so'o se tagata.

I le 1 Korinito 14:32, o lo'o fa'amatala ai e Paulo - e usiusita'i agaga o perofeta i perofeta. Ioe, o le Agaga o le Atua e tu'umumusu; a o upu e fa'a-osofoa, e le o upu e fa'atonuina. O upu e tautala pe tusitusia e le perofeta e i lalo lava o la latou pule, e fa'aaoga a latou upu e ala i lo latou poto masani ma uiga fa'aalia! E manino lava, o le tusitusiga a Peteru na afua mai i le Agaga Paia, e ese mai fo'i i tusitusiga a Paulo, Mareko, ma Luka.

**Tatalo:** Le Ali'i e, fesoasoani mai ia matou malamalama i le uiga moni o upu, nai lo'o le su'esu'eina o i latou na faia upu. **Amene.**

**Aso Faraile – Aukuso 11: “E le o perofetaga uma e fa'atonutonu”**

**Tusi Faitau – Galuega 21:4, 30-36 (Not all prophecy is directive)**

**Matua – f.4:** *“Ua maua fo'i e i matou nisi so'o, ona matou nonofo ai lea i aso e fitu; ua latou fai mai ia Paulo i le Agaga, aua ne'i alu a'e i Ierusalem.”*

Na tatou iloa mai i le tusi o Iona, e masani ona tuu mai perofetaga ina ia lapata'ia ai tagata i mea o le a tutupu i le lumanai, se'i vagana'ua suia o latou amio. Peita'i, o perofetaga, e itiiti lona fa'amamafa i mea o le a tutupu i le lumana'i, ae tele lona fa'amamafa i le fa'amatalaina o le Atua ma lona natura.

O le isi manatu sese ua masani ai e uiga i perofetaga, faimai o perofetaga o ni fa'atonuga mai le Atua e tatau ona fa'atinoia. I le tusi faitau o lenei aso, ua maua ai e Paulo se perofetaga mai tagata talitonu o le nuu, na mafai ona faamaonia e se perofeta lauiloa mai fafo o le aai—o Akapo. E tutusa uma fe'au, afai e alu Paulo i Ierusa-lema, o le a oo iā te ia mea leaga. O le a le taunuuga? Na alu lava Paulo i Ierusalem, ma na oo lava mea leaga ia te ia! Ioe, e moni le perofetaga, ae sa i ai le itu na silafia e Paulo, e lei oo i ai le malamalama o e sa aumaia le perofetaga – ua na'o se feau ua faailoa mai, ae le o se faatonuga. O le iloaina o le mea o le a tupu, e lē o le faamoemoe lea e taofia ai Paulo mai le alu, ae ia saunia o ia mo le mea o le a tupu pe a alu.

**Tatalo:** Le Alii e, ia matou maua le malosi e ala i au perofetaga, ia mafai ai ona matou feagai ma faigata o le ola valaauina, **Amene.**

**Aso Toona'i – Aukuso 12: “O le fa'ai'uga”** (*The end*)

**Tusi Faitau – Mareko 13:2-13**

**Matua – f.6:** *“Aua e to'atele e o mai i lo'u nei igoa, ma fa'apea ane, O a'u o ia, latou te fa'aseseina fo'i tagata e to'atele.”*

O le autu o perofetaga e fa'atatau i le i'uga, o le fa'amalosi ma saunia ai o i tatou - e pei lava o Paulo na saunia i le tatou faitauga mai ananafi. Ae ona o lena, o perofetaga ua aoga lava i 'augatupulaga. Afai e na o le i'uga lava e taliaina ai perofetaga e uiga i le i'uga, e mafai ona le amana'iaina e isi tupulaga na muamua. Ona o lea tulaga, ua fuafuaina perofetaga ina ia fetau ma feso'ota'i ma tupulaga uma. I tupulaga uma talu mai le taimi o Iesu: na i ai taua ma tala o taua, o oge, o lologa, o lamala, ma mafui'e. O ia mea uma e mafai ona fa'apea ai tagata o le a o'o mai le i'uga; e tatau la ona tatou ola saunia mo lea aso, aua tatou te le mautinoa le aso o le a o'o mai ai le i'uga.

E faigofie ma manino le feau. Ia nofo sauna; ia ola nei e peisea'i o taeao le i'uga, tausia pea mafutaga, ia atoatoa le tagata, ma ia alofa i tagata uma. O le lapata'iga o lenei aso e fetau lelei lava: po o a lava perofetaga, ia fa'autauta. O le a le musumusuga a le Agaga i le Ekalesia, i le lalolagi, ma ia te oe? 'Aua ne'i fa'aseseina oe pe fa'avaivai fo'i, ae ia fa'amalosi ma ia saunia lelei.

**Tatalo:** Le Ali'i e, fesoasoani mai ia ou ola i le aso nei ma le malamalama o le fa'avavau. Ia fa'amalosi e oe fa'atasi ma ou folafolaga. **Amene.**

### MOE FILEMU – PEACEFUL SLEEP

**Aso Sā – Aukuso 13: “Moe gase o Atamu”** (*Adam's deep sleep*)

**Tusi Faitau – Kenese 2:21-25**

**Matua – f.21, 22, 24:** *“Ua fa'amoegaseina o Atamu e le Ali'i le Atua...ona toina lea e ia le tasi ona ivi asoaso...ua na fai a'i le fafine...o le mea lea e tu'ua ai e le tane lona tama ma lona tina, a e fa'atasi ma lana ava; ona avea ai lea o i la'ua ma tino e tasi.”*

Talu ai o le mea e alu ai le tasi o vaetolu (1/3) o lo tatou ola i aso uma, o le “moe” o le mea masani e le manatunatu i ai le mafaufau i le tele o taimi, se‘i vagana ua le fa’atinoaina. O le vaiaso lenei o le a tatou iloiloina ai vala o le moe, e pei ona iai i le tele o filifiliga o faitauga Tusi Paia.

Amata mai i le amataga ia le Kenese, ua tatou maua ai le tala i se fafine na foafoaina mai ia Atamu a o faagagaseina o ia i le moe. I talafaasolopito atoa, o nisi tagata na latou ta’ua lenei tala o se faamaoniga o le maualuga o tama ma tamaloloa – o le tama na faia muamua. O se mea lelei e tetee atu ai i lenei manatu masalosalo, o le tala mālie o loo faapea mai: o le foafoaina o le tagata, na toe iloilo e le Atua lana galuega ma ua iloa ai se faaletonu tele; o lea na toe tago ai loa le Atua ma ua na faia ai se galuega sili atu!

O le mea moni, o manatu uma e lua e misia le manatu o le tala – o le finagalo o le Atua Foafoa mo alii ma tamaitai, e le o le ola i le tauivi ma tauvaga, a o i la’ua ia tasi. O lo la’ua loto gatasi ua faatulaga mai ai le finagalo o le Atua mo mafutaga uma, lea e le mafai ai ona tuueseese o itupa, lanu, po o tomai ona iloa ai le tulaga poo le tāua. O le tulaga tutusa ofoofogia o tagata uma, ua na’o le pau lea o le faatāua e finagalo i ai le Atua.

**Tatalo:** Le Atua Foafoa, ia lu’itauina i matou ina ia tetee atu i ni faiga faailoga lanu poo le faailoga tagata i totonu o lau Ekalesia. **Amene.**

### **Aso Gafua – Aukuso 14: “Alafa’i mai i le saogalemu” (Awake in safety) Tusi Faitau – Salamo 3:1-8**

**Matua – f.3, 5:** *“A o oe, le Ali’i e, ua fai oe mo’u talita; o lo’u mamalu fo’i, ma le fa’aeaina lo’u ulu. Na ou ta’oto lava a’u, ma ou moe; na ou ala, aua ua lagolagoina mai le Ali’i ia te a’u.”*

Mo le to’atele o tatou, o le ta’oto i le moega ma faamafanafana i lalo o le ie’afu, o se taimi faafiafia tele lea ola, auā o le a malolo le tino mai gaoioiga o le aso. O nisi taimi, o le taoto i lalo e malolo, o le faailoaina lea o lo tatou vaivaiga ma le aafiagofie i me taufaamata’u; mo tagata sulufa’i o loo feoa’i ma faapena ona momoe i auala ma faitotoa o faleoloa, o le moe, o lona uiga, o le a lē mataala, ma o le a tatalaina fo’i le avanoa mo le gaioi ma osofa’iga. E oo lava ia’i latou e momoe i totonu o le saogalemu o lo latou fale, o le taumafai e moe e mafai fo’i ona osofa’ia o latou lagona e ala i faanoanoaga ma ni mea faaletonu ua tuanai. Mo le toatele, o itula o le po e mafai ona avea ma nofoaga taufaamata’u ma le mata’utia o le faapopolega.

O le ā le fesoasoani e mafai ona ofoina mai e le Fai-Salamo i tulaga faapenei? I tulaga o le olaga, o le mea moni e le o talanoa le Fai-Salamo e uiga i tofotofoga o lo’o feagai i aso uma ma le mea o lo’o siomia ai le tagata. Ae o loo tautala lava o ia i le faatasi mai o le Atua i le ao ma le po. O lea faatuatua e le faapea o se vaifofo mo le lē mautonu, ae o le mea e fai e maua ai le saogalemu o le mafutaga e tusa lava pe faigata ona maua le moe poo miti e faalavelave. O le Alii, o ia na te ta’ita’ia tatou i o tatou vevesi masani i le ao, ma o ia foi e leoleoina o tatou malologa i le po.

**Tatalo:** Le Alii e, faafetai i lou mana tauto'alua ma lou ta'iala mai i taimi uma lo matou ola. **Amene.**

**Aso Lua – Aukuso 15: “Moe lelei”** (*Sound sleep*)

**Tusi Faitau – Fa’ataoto 3:21-26**

**Matua – f.21, 24:** “*Lo’u atali’i e, aua ne’i te’a ese nei mea i ou luma; ia e taofi mau i le pota ma le mafaufau...a e ta’oto e te le fefe; e te ta’oto lava, e malie fo’i au moe.*”

Masalo ua tatou masani i le fuaitau fa’a-Peretania, ‘*You are what you eat*’. O se mea aogā mo le soifua maloloina le lusi o nai pauga. O le tatou tusi faitau o lenei aso, o loo iai se manatu e foliga tutusa ma le fuaitau lea, ae mafai ona fa’alaua’iteleina faapea: ‘Tatou te momoe i le auala tatou te ola ai’ (*We sleep how we live*); ‘O le lelei o la tatou moe, e fesootai tonu ma soo se mea ua faatumulia ai o tatou mafaufau, ma le tino foi, i aso faisoo’ (*The quality of our sleep is directly related to whatever has filled our minds, and bodies, during the day*).

O le ituaiga atamai ma le malamalama o loo faasino mai e le tusi o Faataoto ua utiuti lava i nei ona aso. O ala o faasalalauga ma fesootaiga i luga o le upega tafailagi, i le omai faatasi o tala taufaasese ma tala faatosina, ua le iloa ai tala moni e faavae ai le atamai ma le malamalama. Ou te talitonu o le’o fa’atunuina i tatou e le Fai-Faataoto ina ia lē amanaiaina le faanoanoa ma le mana’oga o lo tatou lalolagi malepelepe; a o le mea e fai e faamanatu mai ai ia’i tatou o lo tatou lalolagi foi e tele mea matagofie, fa’amaoni, fa’amoemoe ma molimau i le finagalo o le Atua i le Fofoaga. E faaalua le pota pe a tatou filifilia lenei malamalama sili atu ona paleni ma atoatoa i le tulaga o loo iai lo tatou lalolagi. E faaoga le pota pe a tatou faaavanoaina se avanoa mo tala o sauāga ma manaoga tigā i a tatou tatalo i le ao, ae ia faatagaina tala o le lelei ma le matagofie e faatumuina ai toe taimi fafagu o le aso.

**Tatalo:** Le Atua e, faafetai ona o le malologa o le po sa matou momoe ai ma le filemu o lau Afio; lenei ua matou alafa’i, viia lau Afio. **Amene.**

**Aso Lulu – Aokuso 16: “Sina moe iti’iti, matamoe”**

**Tusi Faitau – Fa’ataoto 24:30-34** (*Little more sleep, slumber*)

**Matua – ff.30, 33-34:** “*Na ou alu ane i le fanua o le tagata paie; ma le tovine o le tagata ua leai se mafaufau...se’i toetiitiitit sina moe, toe ititit se matamoe, toe itiiti se piilima e taoto ai. A e oo mai lou mativa e pei o le malaga; ma lou le tagolima pei o le tagata ua sauni lana auupega.*”

Sa maua le avanoa ou te faigaluega ai i le faleoloa e fai ai falaoa. Sa ou galue i masini pa’u e gaosi ai le falaoa. E i ai le moli meamata e fa’agaioi ai le masini; ma ave’ese ai lola o falaoa e valusefulu mai le pa’u. Ae a lanu mūmū le moli, ona toe fa’atumu lea o le pa’u i le lola fou e gaosi ai le falaoa.

Sa lelei le fa’atinoina o la’u galuega, se’ia oo i se tasi aso; na ou alu tafao ai i le po atoā, ma sa leai se taimi ou te moe ai, ma ou aga’i sa’o ai i galuega.

O se tulaga le lelei na o'o ia te a'u i lea po, ina ua ou fa'alogoia lo'u fia moe; ma na i'u ai lava ina pepe ifo i lalo o'u laumata. Ua faia gaioiga masani a le masini, a ua fa'ate'ia a'u i le leotele ma le ita o la'u ta'ita'i, ua mu le falaoa.

Ua ou manatua ai upu o le tusi o Fa'ataoto i le vale matamoe ma lona tovine ua tu'ulafoaina! Afai ua tatou maua avanoa mai le Atua mo galuega e fa'aogaina ai o tatou taleni ma meaalofa, e taua le maua lelei o le moe ma saili malosi. E tatau ona tatou mata'ala i galuega, 'aia ne'i matamoe.

**Tatalo:** Fesoasoani mai le Atua, ina ne'i o matou fa'aleaogaina le moe, aua o le mea'alofa ua maua e fiafia ai, **Amene.**

**Aso Tofi – Aokuso 17: “Tofa i totonu o le vaa”** (*Asleep in the boat*)

**Tusi Faitau – Mareko 4:35-41**

**Matua – ff.37-38:** *“Ona to mai lea o le afa, o le matagi tele lava; ona fati mai lea o peau i totonu o le va'a, ua tumu ai. A o ia sa i le taumuli, ua tofa i le aluga; ona latou fafagu lea ia te ia, ma fai mai ia te ia, “Le a'oa'o e, e te le manatu mai ea ia te i matou a fano?”*

E lua ni vavega o loo ta'ua i le tala na vavao ai e Iesu le matagi: o Iesu e malaga i totonu o matagi ma afa e maua ai le malu; ma Iesu e moe i totonu o faigata o afa. Tau mafaufau pe fa'apefea ona moe Iesu i totonu o faigata. So'o se tagata lava e alofa fa'amaoni ma tu'u atu atoa lona malosi e lavea'i ai se tasi, atonu ua ia tofo ma iloa i ona taimi ma le taunu'uga.

Ua tatou faitau pea i tala ia Iesu ma lona a'oa'o atu, aemaise o lona tali atu i tiga o e mama'i. O tala a le au faievagelia, o lo'o fa'aailoa ai lona mana e faia ai vavega, ma e mana'omia fo'i ona toe fa'afoisia lona mana ina ia mafai ona toe fesoasoani atu i isi. Mo Iesu, e le o se mea fa'aleaogaina le moe, aua o le toe fa'afouina o le malosi, e toe a'apa atu ai ma fesoasoani ai i isi.

**Tatalo:** Le Atua fa'amanuia mai a'o matou momoe e saili ai le malosi fa'afouina ina ia matou aulia le aso fou e tautua ai lau afio, **Amene.**

**Aso Faraile – Aokuso 18: “E le oti, ae moe”** (*Not dead but asleep*)

**Tusi Faitau – Mareko 5:35-43**

**Matua – ff.38-40a:** *“Ua o'o i le fale o le pule i le sunako, ona silafia lea e ia o le lauaitu, ma e o taufaitagi, ma e o taufaiuae tele. Ua ulufale atu o ia, ona fa'apea atu lea ia te i latou, ‘Se a le mea ua outou fetagisi ai? E le o oti le teine, ua na ona moe.’ Ona latou tapisa ai lea ia te ia.”*

O le tala i le afafine o Iairo, e tu'ufesili pea i le mafaufau lona fa'atinoina ma lona taunu'uga. Aua tatou te le mafai ona fa'atinoina lea tulaga e pei ona faia e Iesu, o le toe fa'atuina mai o se ua oti ina ia toe maua le mafutaga ma e pele. Ua fa'afesaga'i Iesu ma i latou ua maua i fa'anoanoaga loloto, ma ua latou amoina fa'atasi lagona ootia ma le oona.

E le fa'atauva'a Iesu i le feagai ai ma le loloto moni o mea i le olaga. E le o toe upu lenei, aua o totonu o le alofa o le Tama o lo'o i ai le upu e sili ona lelei – o le fa'amoemoe ma le fa'amalologa e maua ai le filemu e fa'avavau.

**Tatalo:** Le Atua e, e tu'u fesili pea le mafaufau i mea e tiga ai le loto, aumai lou filemu e iloa ai o lo'o tumau lou alofa mo i matou, **Amene.**

**Aso Toonai – Aokuso 19: “E le momoe uma i tatou”**

**Tusi Faitau – 1 Korinito 15:51-58** (*We shall not all sleep*)

**Matua – ff.51-52:** *”Fa’auta mai, ou te ta’u atu ia te outou le mea lilo; e le momoe i tatou uma, a e liua i tatou uma, e fa’afuase’i lava, o le emo o le mata, pe a ilia le pu fa’auma; aua e ilia lava, e toe tutu mai ai e ua oti ma le ola pea, e liua fo’i i tatou.”*

E leai se tasi e na te iloa le mealilo o lo'o i le fa'avavau o le alofa o le Atua. Atonu ua lava le iloaina o le mafutaga vavalalata ma lo tatou Atua e fa'amatala ai mea faigata o lenei olaga, ina ia tatou tumau ai ma ia 'aua ne'i motusia lea mafutaga ma le Atua e ala i le oti. I le tala a Luka e uiga i le toetu; na fesili avefeau e to'alua, 'Pe aisea e sa'ili ai le ua soifua i e ua oti?' Ua fa'amanatu mai le mafua'aga na popole ai Iesu e fa'ailoa atu le atoatoaga o le ola i tagata sa i ai i lea taimi. O le mea lea e ao ai ona tatou fialia ai i le folafolaga e fa'avavau mai lo tatou Atua, ina ia mafai ona fa'aauai ai lea mafutaga ma tagata i le ola atoatoa mai le Atua.

**Tatalo:** Fesoasoani mai le Atua ina ia tatala atu le ola, ma fa'aatoatoaina mo e ua matou mafuta, **Amene.**

## FAITAUGA MAI LE 2 KORINITO

### 1 - Le Atua o fa'amafanafanaga ma le alofa mutimutivale uma

*(The God of all comfort and mercy)*

**Aso Sā – Aokuso 20: “Lagona le taotaomia”** (*Feeling overwhelmed*)

**Tusi Faitau – 2 Korinito 1:1-14**

**Matua – ff.3-4:** *“Ia fa’amanuia le Atua, o le Tama o lo tatou Ali’i o Iesu Keriso, o le Tama e ona le alofa mutimutivale, o le Tama fo’i e ana le fa’amafanafanaga uma; o le na te fa’amafanafanaina mai ia te i matou i lo matou puapuaga uma lava, ina ia matou mafai fa’amafanafana atu ia te i latou ua maua i se tasi lava puapuaga, i le fa’amafanafanaga ua fa’amafanafanaina ai i matou e le Atua.”*

I le lalolagi e tumu i mafatiaga ma fa'afitauli, e faigofie ona maua i tatou i lagona taotaomia ma le le amana'iaina. O Kerisiano i le ulua'i senituri, sa feagai ma sauaga ona o le avea ma soo o Iesu. Fa'amanatu Paulo ia te i latou, o le 'auai fa'atasi i puapuaga o Keriso, o le 'auai foi lea i le fa'amafanafanaga a Keriso. E pei foi o ona puapuaga, ua valaau Paulo i le 'au Kerisiano ina ia onosa'i i puapuaga ona o le Tala Lelei. Fa'amanatu e Paulo le satauro o Keriso. O le ata lea o le alofa o le Atua i le lalolagi. Le alofa mutimutivale o le Atua na iloa i le satauro, ma o le fa'amafanafanaga sili lea mo i tatou i taimi o sauga ma faigata, aemaise o taimi e lagona ai le taotaomia.



**Tatalo:** Le Atua e, a o’o ina le mautonu ma taotaomia o matou lagona, ia matou iloa lou satauro o loo fa’ailoa mai ai lou alofa mutimutivale, **Amene.**

**Aso Gafua – Aokuso 21: “Faiva fa’a-Kerisiano moni”**

**Tusi Faitau – 2 Korinito 1:15-2:11** (*Genuine christian ministry*)

**Maatua – ff. 16-17:** “*Ou te ui atu ai ia te outou i Maketonia, ou te toe sau fo’i ia te outou mai Maketonia, ona molia ai lea o a’u e outou i Iutaia. O lenei, pe ai ea sa’u manatu fa’aletonu ina ua fa’apea ona ou filifili? Pe ou te filifili ea i la le tino i mea ou te filifili ai, ina ia ia te a’u le ioe, ioe, ma le leai, leai?”*

A o’o ina taupule se vala’aulia e ave i ni a tatou uo, e i ai nisi o tatou uo e manatu mamā ma taumate lo latou tali mai. E fa’apea se lagona na o’o ifo i le ‘au Kerisino i Korinito. Ua fa’anoanoa ia Paulo ina ua le taunu’u lona asiga o latou e pei ona fuafuaina. Ua latou fa’asea ai i le Aposetolo, ma faimai ua le fa’amaoni Paulo i ona faiva fa’a-Kerisiano. I le tusi faitau o lenei aso, e lima (5) ni manatu na fofola e Paulo ia Korinito e fa’amatala ai le uiga o le faiva fa’a-Kerisiano moni: O le faiva fa’a-Kerisiano e le mitamita ai le tagata ia te ia, ae mitamita i le Atua (1:12-14); e le o taleni poo mea e malosi ai le faigaluega, a o le malosi o le Atua e ui atu i le faigaluega (1:12-14); o le faiva e ogatotonu i le Atua (1:19-20); o le faiva e ogatotonu ia Keriso (1:19-20); ma le faiva e ta’ita’iina e le Agaga Paia (1:21-22).

**Tatalo:** Le Atua fa’ailoa mai ina ia ou iloa ona fa’atino ou faiva fa’akerisiano moni, ina ia vi’ia ai lau afio ae le o a’u, **Amene.**

**Aso Lua – Aokuso 22: “E te manogi pei o Iesu?”**

**Tusi Faitau – 2 Korinito 2:12-13:18** (*Do you smell like Jesus?*)

**Matua – f.14:** “*Ua fa’afetai i le Atua, o le ua matou manumalo ai pea lava ona o Keriso, o le ua matou fa’aali atu ai fo’i i nu’u uma le manogi o le mataupu ia te ia.*”

O manogi ese’ese e mafai ona fa’afeiloa’i i tatou, atoa ai ma le nanamu e tosina ai o tatou loto. Ua le gata i mea’ai taumafa, a o fuga o la’au o le foafoaga, Lea fo’i ua fa’ailoa ai e Paulo le manogi o Keriso ua nanamu ai le ola. O le ata o le savaliga i le manumalo, a’o feagai ai Paulo ma mafatiaga ona o le mau o lona loto ia Keriso. E i ai nisi e fa’atusaina lenei sauaga o se manogi leaga, peita’i fai mai Paulo o mafatiaga i totonu o le Tala Lelei; o lo’o i ai se malamalama uiga ese. O se malamalama e nanamu lona manogi e fa’ailoa ai le alofa o le Atua, e pei ona iloa i le maliu o le Ali’i o Iesu ina ia manuia le lalolagi.

**Tatalo:** Fa’afetai i le alofa na e fa’aalia i le satauro. Ia sasala le manogi o lena alofa i le galuega fa’ailoa atu e uiga i le taulaga o le alofa, **Amene.**

**Aso Lulu – Aokuso 23: “Ipu omea”** (*Clay jars*)

**Tusi Faitau – 2 Korinito 4:1-15**

**Matua – f.7:** *“A ua ia te i matou lenei oa i ipu omea, ina ia i le Atua le matua tele o le mana, a e le mai ia te i matou.”*

Na amata le manatu a Paulo i le tala fa’atusa e uiga i le oa ua latou maua mai i fagu omea. Ua fa’atusaina lena oa, i le ‘Tala Lelei’ – O le feau ua fa’ailoa ai le togiolaina e Iesu o le lalolagi e ala i lona maliu ma lona toetu. Ua fai le fagu omea ma ave feau o le Tala Lelei. Atonu fo’i o lo’o talanoa Paulo i le suau’u mo le lamepa i le po na gaosia ma fa’atau i Korinito. O le galuega a Paulo ua fa’apei o se fagu maaleale ua na tauaveina le ‘oa taua (*Tala Lelei ia Iesu*). Peita’i, e mafai fo’i ona ta’ulegaina pe afai ua na ona latou va’ava’ai i le fagu, e aunoa ma le iloa o le taua o le ‘oa ua i totonu o le fagu - le tamaoauga e uiga i le Tala Lelei na fa’aalia ia Keriso e ala i lona maliu ma lona toetu.

**Tatalo:** Fa’afetai le Atua i lou fa’aaogaina o lo matou fa’atauva’a e fa’ailoa atu lou Tala Lelei e ala ia Iesu, **Amene.**

**Aso Tofi – Aokuso 24: “Olaga pe a mavae le oti”** (*Life after death*)

**Tusi Faitau – 2 Korinito 4:16-5:13**

**Matua – f.4:** *“Aua o i matou o i lenei fale apitaga, ua feoi i matou o lo’o mafatia; e le ona ua matou loto ina ia toeseina ofu, a ia fa’aofuina, ina ia tofatumoanaina le i’u vale i le ola.”*

O le a le mea e tupu pe o’o mai le oti? O nisi o tu ma aganu’u fa’ale-lotu, e talitonu i le toe fa’afuina. O nisi o filosifia, faimai o tatou ua na’o se ata tifaga, e leai lava se mea i tua atu o le oti.

I le tusi faitau o lenei aso, ua fa’ailoa mai e Paulo, e i ai le ola i tua atu o le oti. E le o atoatoa se iloa ma se va’aiga fa’a-Kerisiano e uiga i le ola lea. A ua tatou mautinoa ma fa’amoemoe, e ala i le toetu o Keriso. Aumai e Paulo ni manatu se tolu, e fa’atusaina ai le olaga i le taimi nei ma le ola i le olaga a sau: o le fale e fa’avavau e sui a’i le fale’ie; o le fa’aofuina nai lo le lavalava; ma, o le fa’aletagata ua tofatumoanaina e le ola. O le oti e fai ma popolega i le tagata. Ae mo le kerisiano, ua fa’amanatu mai e Paulo mo i tatou, e le o le oti le taunu’uga. Tatou te fa’amoemoe i le ola i talaatu o le oti e ala i le toetu.

**Tatalo:** Iesu matou te fa’afetai ina ua e manumalo mai le tuugamau, e maua ai le fa’amoemoe e fa’ailoa ai lou Toetu, **Amene.**

**Aso Faraile – Aokuso 25: “Fa’aleleiga”** (*Reconciliation*)

**Tusi Faitau – 2 Korinito 5:14-21**

**Matua – f.18:** *“O mea uma fo’i mai le Atua ia, ua uma ona fa’aleleia e ia o i tatou ia te ia e ala ia Iesu Keriso, ua tu’uina mai fo’i ia te i matou le galuega o le leleiga.”*

O le tusi lona lua ia Korinito, o lo’o fa’amatalaina ai le fete’enaiga a Paulo i lona tulaga fa’ata’ita’i ma le ‘au Korinito, atoa ai ma le ekalesia. I le amataga o le tusi, o lo’o tautala Paulo i le mafatia, o tiga, ma loimata e fetaia’i

ma i tatou pe afai tatou te le fealolofa'a'i. O le mataupu e 5 e fa'avae ai le finauga a Paulo: i le ogatotonu o fa'afitauli uma, o loo tu ai Iesu Keriso o lē na maliu ma toetu mo i tatou. Keriso na le iloa se agasala, ae na ia tauaveina o tatou agasala i ona luga, ina ia tatou toe fa'alelei ai ma le Atua. O le mea moni o loo i le fatu o le fa'atuatuga Kerisiano, ua aumaia e le Atua le fa'amagaloga, fa'aleleiga ma le fa'amalologa mo tagata uma, e ala ia Iesu Keriso.

**Tatalo:** Le Atua e, o fea lava o ia le fete'ena'i i mafutaga, ia matou iloa ona saili atu i a te oe e maua ai le filemu, **Amene.**

**Aso Toonai – Aokuso 26: “O mata e vaai”** (*Eyes to see*)

**Tusi Faitau – 2 Korinito 6:1-7:1**

**Matua – f. 2b:** *“Fa'auta, o lenei le tausaga e talileleia mai ai; fa'auta, o lenei le aso e fa'aolaina ai.”*

O le faitauga o lenei aso, o se fa'atalaaula ina ia tatou va'ai i se va'aiga e ese mai. A tatou va'ai mai le va'aiga masani, o Paulo ma lana galuega tala'i e tele mea sa fa'aletonu ai. Ae a tatou va'ai mai le va'aiga o le saturo, o Paulo ma lana galuega, o le auuuna a le Atua o lo'o savavali i le ala o Iesu.

I le mataupu sa faitauina, o lo'o augani Paulo ia Korinito ina ia taula'i le va'ai ia Iesu ma le satauro. Aumai e Paulo le manatu mai le tusi o le perofeta o Isaia 49:8, *‘O lo'o fa'apea ona fetalai mai o le Ali'i, o ona po o le alofa na ou tali atu ai ia te oe; o le aso e fa'aolaina ai ua ou fesoasoani ai ia te oe;’* E lua mea taua o loo fa'atino e Paulo i lona fa'aaogaina o Isaia: fa'atusa e Paulo lana galuega i le galuega a Isaia i le folafolaina atu o le feau o le alofa tunoa o le Atua i atunuu uma; ma le tali atu o le tagata fa'alogi i lona feau. O le aso lenei, fai mai o ia, o le taimi o le fa'aolataga. Ua maliu Iesu i luga o le satauro ina ia fa'alelei ai i tatou ma le Atua. Ua vala'aulia i tatou e Paulo e omai e **'vaai'**. Ae le gata i lea, ua vala'aulia foi i tatou e sauni so tatou tali i le mea ua tatou va'ai ai.

**Tatalo:** Ia va'ai o matou mata i mea ua e faia e ala i le galuega a Iesu, atoa ai ma mea ua e fa'atino i o matou ola i taimi le faigofie, **Amene.**

## FAITAUGA MAI LE 2 KORINITO

### 2 - Ola i le alofa tunoa o le Atua (*Living in God's grace*)

**Aso Sa – Aokuso 27: “Tiga fa'ale-Atua”** (*Godly sorrow*)

**Tusi Faitau – 2 Korinito 7:2-16**

**Matua – f. 11:** *“Fa'auta fo'i i lenei lava mea, na tiga outou e tusa i le Atua, ua tele lava le filiga na tupu ai ia te outou, i le ma le fa'aletonu, i le ma le loto tiga, i le ma le mata'u, i le ma le naunau tele mai, i le ma le maelega, i le ma le tau'i atu. Ua uma ona fa'ailoa outou e outou ua outou mama i lona mea.”*

I lenei faitauga, ua tatala atoa mai le loto o le Aposetolo. Ua popole Paulo i le 'au fa'atuatua i Korinito, ina ua iloa ua fai si mamafa o ana apoapoa'iga e pei ona tusi atu ai. Ae pei ona aoa'i le Tama i lona atalii, e le mafai e Paulo

ona tuu atu latou e fai pea le mea sese. E tusa ai ma ona puapuaga, ua naunau Paulo ina ia toe foi le ‘au Kerisiano i a’oa’oga a Iesu. Ua auina atu Tito ma le fa’amoemoe, e foi mai e fa’aioa mai ia te ia le mea moni o loo tupu. Peita’i, ua le lavā e Paulo fa’atali, ona malaga ai lea i Teroa i Maketonia e fa’afeiloa’i Tito ma se’i fa’alogo i lana molimau. O se mapusaga e sili ona lelei sa oo ia Paulo, ina ua maua tala i le ‘au fa’atuatua i Korinito, ua latou le talituaalimaina “tiga fa’ale-Atua.” O lo’o galue le Atua ina ia fa’afouina o tatou olaga e ala i lona alofa tunoa.

**Tatalo:** Iesu, auina mai lou mana e tafieseaa ai fa’aletonu i o matou tagata saili i lau afio. Ia mafai ona fa’afouina i matou ma saili atu i lau afio, **Amene.**

### **Aso Gafua – Aokuso 28: “Olioli ma le agalelei taumasuasua”**

**Tusi Faitau – 2 Korinito 8:1-9:2** (*Overflowing joy and generosity*)

**Matua – f.8:2:** “*Aua na tofotofoteleina i latou i puapuaga ua atili ai lo latou olioli, atoa ma lo latou mativa matua tele, ua sili ai le faulai o lo latou matamau.*”

O le tulaga utiuti o le tamaoaiga ma le le tagolima, e mafua ai ona saili fesoasoani le tagata. E fa’apena se ata na tatou molimauina i le vaitau na osofa’ia ai i tatou e le koviti-19, ma o’o ai i se tulaga faigata i le soifuaga. Ua tapunia faleoloa ma pisinisi. Ua fa’amalolo tagata mai galuega. Ua pa’u le tupe maua a aiga, atoa ai ma le ola fia a’ai. O isi sa tumau i le ola fa’atuatua ma saili auala e maua ai le fesoasoani i lena taimi. Sa fa’aaogaina fesoota’iga fa’atekenolosi e saili ai, ma latou fa’atino ai le ola fesoasoani e pei o nisi o ekalesia. Sa faia ma le alofa le ola foa’i atu.

I lona augani atu i le ola foa’i, e le o fa’atonu e Paulo le ‘au Kerisiano i Korinito i se aofa’i e fa’atino ai, ae manino le f.14, “*ina ia fesoasoani lo outou tamaoaiga i lo latou matitiva i nei ona po; ma ia fesoasoani lo latou tamaoaiga i lo outou matitiva i se aso, ina ia fai fa’ataau.*”

**Tatalo:** Ia matou fa’aioa lou alofa tunoa, ma ia ta’utino e fesoasoani i nisi i taimi o latou mafatiaga. Fesoasoani mai lou Agaga, **Amene.**

### **Aso Lua – Aokuso 29: “Foi ma le loto malie”** (*Cheerful givers*)

**Tusi Faitau – 2 Korinito 9:3-15**

**Matua – f.7:** “*Ia taitoatasi ma foi e pei ona filifili i lona loto; aua ma le tiga, aua foi ma le fa’atauanaui; aua e alofa le Atua i le ua foi ma le loto malie.*”

Ua tatou molimauina le tele o auala ese’ese ua fa’atino ai aisiga ma sailiga a le to’atele o fa’alapopotoga ina ia maua mai ai fesoasoani ae a se fa’amoemoe o alo atu i ai. I lenei vaitau o le tekenelosi, ua na o le omiomi lava o le telefoni e saili fesoasoani ai, aemaise i luga o ala leo e fa’asalalau ai. Ua faigofie ai i tagata ona foa’i atu mo e o loo moomia le fesoasoani.

E lei matamuli Paulo e augani i le ‘au Kerisiano i Korinito mo se fesoasoani mo lana galuega tala’i. Na iite lava Paulo i le amataga, e le tali tua-

limaina e Korinito lana sailiga. Ua fa’alogo Korinito i le faigata o le galuega i Ierusalem, a’o le talosaga ma le fa’atauanau a Paulo; na mafai ai ona latou lagonaina mana’oga ale Aposetolo. Ua latou iloa fo’i o le foa’i o le a latou fa’atino; o le finagalo lea o le Atua.

**Tatalo:** Iesu tatala o matou loto ina ia fofola atu o matou lima e ala i le soifua foa’i mo se ua mana’omia lou fesoasoani, **Amene.**

**Aso Lulu – Aokuso 30: “Feagai ma mea lē moni”** (*Confronting untruth*)  
**Tusi Faitau – 2 Korinito 10:1-18**

**Matua – f.18:** “*Aua e le talia o le ua vivii o ia ia te ia, a o le ua viia e le Alii.*”

A o tupu ma ola le Ulua’i Ekalesia, e tele faigata sa feagai ma Paulo: o tagata tau fa’aleaga, o tagata faitala sese, o faitioga, ma a’oa’oga tau fa’asese. O le tusi faitau o lenei aso, o le tali atu lea o Paulo ia i latou sa tau fa’aleaga i lana galuega. O le ‘au tau fa’aleaga, e vivii lava latou ia ia te i latou. A o Paulo, e vivii i le Atua. O le loto onosa’i ma le fa’amaoni i le alofa o le Atua, e mafai ai ona talepe manatu sese e fa’ailoa mai e isi. E ui ua latou iloa ana a’oa’oga, ae faigata ona latou taliaina ona o le malosi o le ‘au tau faaleaga. Ua talosaga ai Paulo i le ‘au faatuatua i Korinito, ina ia talia lona toe fo’i atu, e ala i le loto maulalo ma le alofa o Keriso, e mafai ai mea uma.

**Tatalo:** Ia manino la matou va’ai ina ia matou iloa lou finagalo mo i matou ma ou tagata fa’atuatua, **Amene.**

**Aso Tofi – Aokuso 31: “O tatou manaomia ni aposetolo silisili?”**

**Tusi Faitau – 2 Korinito 11:1-15** (*Do we need ‘super-apostles’?*)

**Matua – ff. 5-6a:** “*Aua o lo’u lea manatu, e leai se mea e tasi ou te iti’iti ai i aposetolo silisili. Afai fo’i ou te valea i le upu, ou le valea i le iloa.*”

I le faitauga o lenei aso, ua atagia lagona le fiafia o Paul ona o le tele o faitioga ua tu’uaia ai o ia. O manatu ia a latou ua fa’aigoaina e Paulo, o perofeta pepelo, ina ua latou upu leagaina ma faifai le uiga o lana tala’iga. O le tele o ia faitioga, ua latou aumaia ai fa’amaumauga a le tala fa’asolopito e fa’avae ai, e pei o galuega a le au fai filosifia ma failauga. Ua aumai ai le manatu, e le’i togia i latou e tusa ma a latou galuega fa’atino. Ma ua manatu i latou, o Paulo ua fa’atino lana galuega ina ia maua ai ni ana mea. O le ala popole lea o le Aposetolo i tagata pepelo ma le fa’aole’ole, ua pei o ni aposetolo moni o Keriso. Ae manatua ai le fetalaiga a le Alii, “O la’au ta’itasi, e iloa i ona lava fua.” (Lk6:44)

**Tatalo:** Musumusu le Agaga o lau afio ina ia matou fa’amaoni i lau galuega, ma lou manuia e fa’amuamua ai le alofa, **Amene.**

**Aso Faraile – Setema 1: “Alofa tunoa ma le vaivai”** (*Grace and weakness*)

**Tusi Faitau – 2 Korinito 11:16-12:13**

**Matua – f.12:9,** “*Ona fa’apea mai ai lea o ia ia te a’u, ‘O lo’u nei alofa tunoa e lava lea e fesoasoani ia te oe; aua o le vaivai e fa’aatoaina ai lo’u mana.*”

E faigata ona molimau i le alofa o le Atua i taimi o faigata. E i ai fo’i taimi tatou te lototele ai e fa’ailoa lagona vaivai, ma le leai o se fa’amoemoe, atoa ai ma se fesoasoani, ona o le manatu a nisi e amuamu ma faitioina i tatou. Ua fa’ailoa e Paulo le lagona e uiga i tiga o le tino na ia mafatia ai, a’o ana tatalo ina ia sa’oloto ua le gata mo ia ae fa’apena outou uma. Po ua tatou sauni e talia vaivaiga atoa ma le loto e talitonu i le Atua lavea’i. Tatou tatala o tatou loto ma fa’atuatua ia te ia.

**Tatalo:** Iesu, leoleo mai i matou mai faigata ma le loto vaivai. Ia fa’amalosi ma fa’amanuia i lo matou fa’amoemoe, **Amene.**

**Aso Toonai – Setema 2: “Tofotofo ia i tatou”** (*Testing ourselves*)

**Tusi Faitau – 2 Korinito 12:14-13:14**

**Matua – f.13:5:** “*Ina tofotofo ia outou ia te outou, po ua outou i le fa’atuatua; ina su’esu’e ifo ia ia te outou; pe tou te iloa ea o outou loto, ua i totonu ia te outou o Iesu Keriso, pe afai ua le pepelo outou?”*

‘Tofotofo ia te outou,’ o le fa’atonuga lea a Paulo ua poloa’ina ai tagata Korinito, ma i tatou, ina ia manatunatu; pe tatou te tumau i lo tatou fa’atuatua ma le mautinoa atoatoa i le Tala Lelei. O lenei luita’u e aofia ai le su’esu’eina pe moni la tatou tapua’iga, pe tatou te lagonaina ma le mautinoa, o le fa’amaoni ma le alofa tunoa o le Atua e lagolagoina i tatou. E mafai ona iloa pe afai tatou te ola moni ia Keriso, ma avea i tatou o tagata fa’amaoni. Pe tatou te fefefe i le to’ilalo?

O le fa’amanatu mulimuli a Paulo; ua ia aumaia ai mo i tatou se ata mo nisi o taunu’uga tatou te maua ona o se nu’u fa’atuatua e pei ona ia ta’ua ai le ekalesia i Korinito. ‘Ia tauivi mo le toe fa’aleleia atoatoa, ia fa’alaeiau o le tasi i le tasi, ia tasi le manatu, ia ola i le filemu.’ O tatou i ai i le ala sa’o?

**Tatalo:** A’o matou taumafai e savavali i ou ala le Atua, fa’ailoa mai ou ala, ina ia avea i matou ma so’o moni mo oe, **Amene.**

## ANAPOGI – FASTING

**Aso Sā – Setema 3: “O le a le anapogi e taliaina?”**

**Tusi Faitau – Isaia 58:3-11** (*What is acceptable fasting?*)

**Matua – ff.6a-10:** “*E le o lenei ea le anapogi ou te loto i ai? Ina ia tatalaina fusi na faia i le amio leaga, e tatala fusi o le amo, e tu’uina atu ia sa’oloto e ua fa’asauaina...Afai fo’i e te alofa atu i le ua fia ‘ai, ma fafaga ia ma’ona o le ua tiga; ona alu a’e lea o lou malamalama i le pouliuli, ma lou pogisa e pei o le aouli ia.*”

O le a le anapogi e sili ona lelei? O le fesili lea na tu’uina atu e Isaia i lona nuu o Isaraelu, ae peiseai e lagona foi lona talafeagai i o tatou vaitaimi. O le a

se fesoasoani e maua i nei ona aso mai le anapogi? O le a se lelei e maua mai ai? Fa'amata e mafai ona tupu le ola i taimi e maaleale ai le fa'amoemoe?

O faitauga o lenei vaiaso e taula'i uma e fa'amatala le uiga o le anapogi – o se tasi o ituaiga tatalo e fa'alagolago ai i le Atua ma saili lona finagalo i totonu o avanoa tatou te faia, pe a tuu ese mea tatou te loto i ai. Tatou te faia avanoa mo isi, pe a tatou filifili e saili le mea moni o loo mana'omia. Fa'ataoto mai e Isaia le finagalo o le Atua e tusa ma le anapogi: e le na'o le tatalo ma nofonofa, a o le tatalo ma fa'atino suiga lelei i nofoaga o i ai sauaga, le amioletonu, o tagata ua leai ni mea e nonofo ai, ma tagata o loo matelaina. O le a le anapogi e taliaina? O le faia o avanoa e galulue ai ma le Atua e fa'amalolo le lalolagi ua gasegasea.

**Tatalo:** Ia matou iloa ona saili i lau afio e ala i le anapogi, e fa'afouina ai manatu mo lau afio, **Amene.**

#### **Aso Gafua – Setema 4: “O Anapogi lelei e lē fa'anatinatia”**

**Tusi Faitau – 1 Samuelu 14:24-30** (*Good fasts take time*)

**Matua – f.24:** *“Sa tigaina tagata Isaraelu i lea aso, auā na fai atu Saulo i le nuu ia tauto, o loo fa'apea, Ia malaia le tagata na te 'ai se mea seia oo i le po, ina ia ou tau ai i o'u fili; ona le 'ai lava lea se mea e le nuu uma.”*

O Saulo sa fa'anatinati lona fa'atonuina o lana 'au tau e anapopogi. O le taunuuga o lea fa'atonuga, e pei ona tatou faitau i le tala, ua vaivai le 'au tau ma ua 'matapogia' i le fia 'aai. Ua iloa e Ionatana ua leai se malosi o i le 'au tau e fa'ato'ilaloina ai o latou fili. O le faia o se fa'ai'uga fa'anatinati e aunoa ma se tofa liuliu, e lē i'u lelei. O le anapogi o se gaiogiga e fa'anaunau i le tatalo ma le sailia ai o le avanoa e fa'atalitali ai i le Alii. I lona avanoa e tatou te a'oa'o ai pe mafai fa'apefea ona tatou tali atu i manaoga o loo siomia ai i tatou i le alofa. E fa'apena foi i a tatou lava faiga filifiliga i aso taitasi, e ma'eua le tāua o le fa'aalu o se taimi e fa'amautinoa ai ma le agaga tatalo, o mea tatou te filifili i ai, ia 'aua ne'i aafia ai i latou o lo'o si'omia i tatou.

**Tatalo:** Le Atua alofa e, fesoasoani mai ia ou fa'aavanoaina se taimi e saili ma fa'atalitali atu ai i le anapogi ma le tatalo, **Amene.**

#### **Aso Lua – Setema 5: “Anapogi – o se fa'avae malosi”**

**Tusi Faitau – Tanielu 1:3-17** (*Fasting – a strong foundation*)

**Matua – ff.12b,15,17a:** *“Ia latou au mai ai ia te ia matou ni fua o laau e aai ai, ma vai e inu ai ... ua mavae po e sefulu, ona iloa lea ua sili ona lalelei o latou mata, mona tino lelei i tama uma e na aai i mea taumafa a le tupu ... a o ia tama e toafa ua foaiina e le Atua ia te i latou le fa'autauta ma le atamai i tusi uma lava, atoa ma le pota.”*

O le autū o lenei aso o loo fa'atāuaina ai le fausia o se fa'avae malosi o le ola anapogi. O Tanielu, Sataraka, Mesako ma Apeteniko, e pei ona aumaia i le tatou tusi faitau, o ni fa'ataitaiga lelei o tagata e malosi le fa'avaeina o latou soifua i tu ma aga masani fa'a-Isaraelu; o i latou fo'i e mafai ai ona ta'ialaina i

tatou i le fa'atua mausali, i taimi faigata e sili ona lamatia ai le tagata ola. E ui ina fa'atagataotauaina i latou, fa'apea ma le tineia ai o a latou tu ma aga masani, e oo lava i le suia ai o latou igoa Eperu; na mafaia lava e nei alii talavou e to'afā ona tutumau pea i a'oa'oga ma faiga masani na latou soifua ai, i le itu fa'aletino, aemaise le fa'aleagaga. E le'i avea le ola lamatia ma mea latou te filifili ai e taumamafa i mea'ai a le tupu; ae na latou filifili lava e tumau fa'amaoni i mea sa latou talitonu e maua ai le ola ma le malosi—o le ola fa'alagolago lea i le Atua.

**Tatalo:** Le Atua e, matou te tatalo ina ia fa'atumaui le fa'avae o le ola fa'aleagaga, e fa'afesaga'i ai i matou ma mea faigatā, **Amene.**

**Aso Lulu – Setema 6: “Loto maualalo ma le salamō”** (*Humility and repentance*)

**Tusi Faitau – 1 Tupu 21:20-29**

**Matua – ff.27b-29a:** *“Ua anapogi, ma taoto i ie talatala, ma fealualuai fa'afifilemu. Ona tulei mai lea o le afioga a le ALII ia Elia le Tisepe, ua fa'apea mai, ua e iloa ea ua fa'amaualalo Aapo i o'u luma? Auā ua ia fa'amaualalo i o'u luma, o le mea lea ou te le fa'aoo ai le leaga i lana nofoaiga.”*

O le tala ia Aapo, o le tala o lapata'iga—afai e te amio leaga ma fa'atigā i le Atua, e fa'amasinoina oe i taunuuga matautia. O le perofeta o Elia sa fa'aleoina le fa'amasinoga a le Atua ia Aapo. I le fa'aiuga o le tala, faimai ua lagona e Aapo le mea moni ma ua fa'amaualalo i luma o le Atua e ala i le anapogi. E ui i le amioleaga o Aapo, ae sa lagona lava e ia le taua o le anapogi; ua toe saili ai le mafutaga ma le Atua. O le anapogi ua fa'aioa mai ai lona salamo. Ua silafia e le Atua le salamo fa'amaoni o Aapo, o lea na le fa'aoo ai le leaga i lana nofoa'iga.

**Tatalo:** Ia ta'ita'iina i matou i se nofoaga e tafi'esea ai le popole ma le maasiasi i le mana o le alofa mutimutivale o le Atua, **Amene.**

**Aso Tofi – Setema 7: “Fa'atoga– anapogi mo isi”**

**Tusi Faitau – Neemia 1:1-25** (*Intercession – fasting for others*)

**Matua – ff. 3-4:** *“Ona fa'apea mai lea o i latou ia te au, O e totoe o e na totoe o le tafeaga o i ai i le itu malo, ua tele le puapuaga ma le gaogaoina o i latou; ua soloia foi le pa o Ierusalem, ma ua mu ona puipui i le afi. Ua ou fa'alogo i ia upu, ona ou nofo ai lea i lalo, ma ou tagi, ma fa'anono i nisi aso, ma anapogi, ma tatalo i luma o le Atua o le lagi.”*

Ina ua silafia le tulaga pagātia o ona tagata, na fa'aavanoa e Neemia lona taimi e anapogi ma tatalo ai i le Atua o le lagi; o le tatalo e aofia ai le fa'atoga atu i lona pule, ma le anapogi na fa'aalia ai le Atua e fa'afofoga mai i ona tagata. O le tasi nei o le tāua o le anapogi, aemaise le fa'atoga atu mo nisi. O le ofoina o le taimi ma le avanoa e saili atu ai i le Atua ona o nisi, ua se fa'amoemoe tāua tele i luma o le silafaga o le Atua; auā o i tatou lava na faia



ina ia atagia foliga o le Atua i o tatou ola. O le Atua e tali tatalo. Ae sili ona fa'aali mai o le Atua i le tagata e tatalo ma anapogi ona o le alofa atu mo isi.

**Tatalo:** Le Atua o le alofa mutimutivale, fesoasoani mai ia te a'u e tatalo fa'amaoni mo le lalolagi ma ona mafatiaga, **Amene.**

**Aso Faraile – Setema 8: “Anapogi fa’apopotoga”** (*Community fasts*)

**Tusi Faitau – Esera 8:21-23**

**Matua – f.23:** *“Ua matou anapopogi foi ma sailiili i lo matou Atua ona o lea mea, ma ua fa’afofoga mai ai o ia ia te i matou.”*

O le “fa’apopotoga” e aofia ai tagata uma o se nuu poo se afioaga. Pe olioli pe fa’anoanoa, e omai fa’atasi uma le fa’apopotoga pe a aafia i se mea ua tupu. Afai e aafia le nuu i se fa’amata’u mai fafo, e aafia uma i latou o lea nuu. E tau fa’apea se manatu ol e tusi faitau o lenei aso. Ua fa’atupuia le fa’amata’u o Esera ma le nuu ona o e sauā i le ala. Ona tala’i lea e Esera i le nuu ina ia latou anapopogi ma fa’amoemoe i lo latou Atua e maua ai le ta’iala saogalemu i luga o le ala. O le anapogi fa’apopotoga na maua ai e Esera le mautinoa o le Atua i luga o le ala. O le tāua o le anapogi fa’apopotoga, e mafaia ai ona tatou te’ena fa’atasi o mea ua tatou masani ai ma ua fa’aalu ai o tatou taimi. E maua ai le tutu fa’atasi ma le galulue fa’atasi o tagata, aemaise o le tatalo fa’atasi ma vala’au atu i le Atua mo lona fesoasoani mai. O le tatalo fa’atasi fa’apopotoga ina ia faia le finagalo o le Atua i le lalolagi, o le aioiga e sili ona tāua.

**Tatalo:** Le Atua e, matou te tatalo mo le fa’atāuaina o le anapogi fa’apopotoga, aemaise o nofoaga ma laueleele o loo matou ola ai, **Amene.**

**Aso Toona’i – Setema 9: “Ua ia te i tatou le Atua”** (*God is with us*)

**Tusi Faitau – Galuega 13:1-3**

**Matua – f.2:** *“O latou o auauna i le Alii ma anapopogi, ona fetali mai lea o le Agaga Paia, ‘Totofi ia mo a’u o Panapa ma Saulo i le galuega ua ou valaauina ai i laua.’”*

O i ai se fesoota’iga i le tapua’iga ma le anapogi? O i ai sona aogā na iloa e le ‘au apusetolo? O faitauga i lenei vaiaso sa su’esu’eina ai le taua o le anapogi i olaga o tagata ta’ito’atasi, fa’apea ma ta’ita’i ma le fa’apopotoga. Sa tatou mafaufau loloto i anapogi o le salamō, anapogi ua avea ma puna o le malosi, anapogi iloatino, anapogi lotomaulalo, ma le anapogi fa’apopotoga. I taimi uma sa fa’ataunuuina ai anapogi ta’itasi, sa auai le Atua ma i latou; sa fa’afofoga ma tali mai i ona ala fa’a-le Atua. Ua tatou iloa ai le Atua, e nofosauni e ua’i atoatoa i so’o se tasi e sa’ili mai ia te ia. E foliga mai, e anapogi fa’atasi le Atua ma i tatou. E oo fo’i iā Aapo, o lē na mamao ese mai i le Atua, ae le’i tuulafoa’ia o ia e le Atua na ia tuulafoa’iina. O le anapogi e ta’ita’i atu ai i tatou i le Atua. E faia le tapuaiga ina ia tatou tali atu ma le fa’afetai, e avea ma puna o le malosi fa’afouina, o le fa’amoemoe ma le fa’atuatua.

**Tatalo:** Le Alii e, fesoasoani ia matou lagona le loto fa’afetai a o matou anapopogi ina ia maua le fa’amoemoe ma le malosi fa’afouina, **Amene.**

## O LE EVAGELIA O MATAIO (5)

### 1 - O lē afio mai i le suafa o le Alii (*He who comes in the name of the Lord*)

**Aso Sā – Setema 10: “Tulafono faigata ma le alofa tatau”**

**Tusi Faitau – Mataio 19:1-15** (*Tough law and proper love*)

**Matua – ff.5-6:** “*Na ia fetalai ane foi, ‘O le mea lea e tuua ai e le tane o lona tamā ma lona tinā, a e fa’atasi ma lana avā; ona avea lea o i laua o le tino e tasi.’ O lea e le toe toalua ai, a o le tino e tasi i laua; o lenei, o e ua fa’atasia e le Atua, aua ne’i fa’ateaeseina e se tagata.”*

O lenei vaiaso tatou te mulimuli ia Iesu i lana malaga fa’aiu i Ierusalem, aemaise le taunuuga sa fa’atali mai ia te ia ona o ē sa naunau e fasioti ia te ia. Ua fa’atupula’ia le vevesi, ma o Iesu fo’i, ua fai ma fa’aonoona i ta’ita’i o le lotu Iutaia, o e na fiafia e ola i le tulafono a le Atua, ae pogisa i le agaga moni o loo taoto ai tua. E pei o le tusi faitau o lenei aso, i le tulafono i le fa’ate’aina e le tane o lana avā; lea sa fesili fa’afia-amiotonu ai le ‘au Faresaio.

O le tulafono lea na tu’uina mai e Mose, e mafai ai e le tane ona fa’ate’a lana avā e ala i le tu’uina atu o se fa’aaliga tususia. O le isi lea tulafono ua sili ona pologa ai fafine - ua pei o meatotino e mafai ona tuulafoa’i. Sa tau-mafai le ‘au Faresaio e fa’amailei Iesu, peita’i, na fa’apupula e Iesu i le mea e sili atu i le tulafono – o le alofa o le Atua.

**Tatalo:** Le Atua alofa e, ia tatala o matou tagata i le musumusuga o lou Agaga a o matou saili le ola i lenei lalolagi, **Amene.**

**Aso Gafua – Setema 11: “Fa’aofi le kamela”** (*Threading the camel*)

**Tusi Faitau – Mataio 19:16-30**

**Matua – ff.23-24:** “*Ona fetalai atu ai lea o Iesu i ona soo, ‘E moni, ou te fai atu ia te outou, e faigata ona sao atu o le mauoa i le malo o le lagi. Ou te fai atu foi ia te outou, e faigofie ona ui atu o se kamela i le pu o le au, a e faigata ona sao o le mauoa i le malo o le Atua.’”*

Mo i tatou e sili atu mea tatou te maua nai lo mea tatou te mana’omia, o se lu’itau mo i tatou le tusi faitau o lenei aso. E taofia ea le tagata ua tele ana mea mai le Malo o le Atua? Ae a le tagata e tele ana mea ae fa’atuatua i le Atua o le puna o fa’amanuiaga uma? O le a le uiga moni o le a’oa’oga a Iesu i le kamela ma le pu o le au? E tele manatu e uiga i lenei a’oa’oga. O isi ua faimai, o le “pu o le au” o le faitotoa vāapiapi o le Malo i le Lagi e faigata i le kamela ona ofi ai. Ae faimai Iesu, e faigofie i le kamela ona ofi ai nai lo le tagata mau mea. E le o fa’aleaga e Iesu le tamaoiga. Pau le itu e leaga ai, pe a sese lona fa’aaogaina.

E faigofie ona fa’aaoga le tamaoiga e lavea’i ai i tatou mai le lalolagi ma ona vevesiga. Peita’i, afai o lea, e misi ai le avanoa e mafai ona tatou

molimau ai i le galue mai o le alofa o le Atua i lo tatou ola. A tatou le iloa le galue mai o le alofa o le Atua, e faigata foi ona tatou iloa ona alolofa atu i isi.

**Tatalo:** Le Atua alofa e, ia matou mulimuli lava ia Iesu ma saili ai i le ola ua e foa'ifua mai mo i matou—le ola ua i ai lou lava atoatoa, **Amene.**

### **Aso Lua – Setema 12: “O se totogi talafeagai” (A fair wage)**

#### **Tusi Faitau – Mataio 20:1-16**

**Matua – ff.14-15:** *“Ina tago ia i lau mea, ma alu; o la’u pule lea e avatu lava i lenei na mulimuli e pei o a oe lava. E le faitalia ea a’u ona pule i a’u lava mea? e te fa’aūū mai ea ina ua ou agalelei?”*

I le tusi faitau, ua fa’atusa e Iesu le Malo o le Atua e pei o se tagata e pule i le tovine, ua filifili e totogi tutusa tagata uma e tusa lava po o le a le tele o itula na galue ai. O le mea lea ua lotovale ai i latou sa tele itula na faigaluega ai i le aso. Na latou malilie i le totogi na tuuina atu, a o lea ua latou manana’o e tuuina atu nisi mea. E fa’afefea ona tu’u atu e se tasi i tagata uma le totogi tutusa? E le umi atu ea le galulue a i latou na muamua mai nai lo i latou na tuai mai? Afai e tele tupe e ofoina atu, e le tataua ea ona latou mauaina?

I le va’aiga masani, e foliga mai e sa’o lo latou manatu; e tataua lava ona faia le amiotonu ma le mea sa’o. Peita’i, ua latou maua le mea na latou malilie ai i se totogi sa’o mo galuega na latou faia. O se fa’atinoga o le agalelei, ae le o ni fa’aletonu, e pei ona tuuina atu ai o le totogi tutusa i ē na mulimuli mai. Pe ua lē tataua ea ona lima foai lenei tovine? O le mea moni, e pule lava le tovine. E pule fo’i le Atua i le tau i le tagata faigaluega; i e na muamua mai, ma e na mulimuli mai. E le fuaina le tau i le Atua i mea a tagata ma le lalolagi.

**Tatalo:** Fa’afetai le Atua ona lou alofa foa’i ma lou alofa fua mai e aunoa lava ma so matou fa’atinoga. E te fa’asoa tutusa lava i lau fanau, **Amene.**

### **Aso Lulu – Setema 13: “O fa’amoemoega ua fulifao”**

#### **Tusi Faitau – Mataio 20:17-34 (The upending of expectations)**

**Matua – ff.26b-28:** *“A o sē fia sili ia te outou, ia fai o ia ma a outou auauna; o sē fia muamua foi ia te outou, ia fai o ia ma a outou tautua. E pei o le Atalii o le tagata e lei sau ia ina ia auauna mai tagata ia te ia, a ia auauna atu ia, ma foaiina atu lona ola e fai ma togiola e sui a’i tagata e toatele.”*

Ua afio a’e Iesu i Ierusalem, ma o le a feagai ma puapuaga e i’u ai i lona maliu i luga o le satauro. Silafia e Iesu le mea o le a tupu. Ua tele foi taimi sa fa’aailoa ai e Iesu lenei taunuuga i lona ‘ausoo, ae le o malamalama. Ae ana malamalama foi, e le talitonu. Auā e fa’apefea ona oo le oti ia Iesu, ae leai sana mea sese na fai? Tele ana mea lelei na fai, na fa’amalolo i tagata mama’i, fesoasoani i tagata sa manaomia le fesoasoani, ae leaga le iuga e taunuu ai? O le mutaaga lea o le fa’amoemoe o le ‘ausoo pe a tupu lenei mea ia Iesu. E le fesiligia le lē mautonu o lagona a Iesu ma lona ‘ausoo a’o aga’i atu i Ierusalem, ae mapuna mai ma le fesili a le tinā o le fanau a Sepetaio, o

Iakopo ma Ioane, ma ua feita ai isi soo. O le tali a Iesu, o le tautua ma le auuana atu.

**Tatalo:** Le Alii e Iesu, ia matou mulimuli atu i ou ala alofa, auā ua matou iloa o le tautuaina o tagata, o lo matou tautuaina foi lea o lau Afio, **Amene.**

**Aso Tofi – Setema 14: “Osana – Lavea’i i matou!”** (*Hosanna – set us free!*)

**Tusi Faitau – Mataio 21:1-11**

**Matua – ff.8-9:** *“O le toatele o le motu o tagata ua fofola o latou afu i le ala; o isi foi ua latou sala i lālā o laau ma folasia ai le ala. O le motu o tagata ua muamua, ma e ua mulimuli, ua alalaga i latou, ua fa’apea mai, ‘Osana i le alo o Tavita; ia mauia lē afio mai i le suafa o le Alii. Osana i mea e aupito i luga.’”*

Ua maua e Iesu le viiga sa tatau ia te ia ina ua ti’eti’e i Ierusalemā e pei o se tupu i luga o le asini. O le taimi tumutumu lea o Ierusalemā i le vaitau o le Paseka. E foliga mai na sauni le motu o tagata i le oo mai o Iesu, ina ua talotalo ma fofola lau pama i luga o le auala. Na latou fofola fo’i o latou ofu i le ala, o se faiga anamua e iloa ai le afio mai o se tupu fou e foua le tupu tuai. O lo latou alalaga, ‘Osana i le Alo o Tavita,’ o le faailoga o lo latou tetee i le pule’aga sa i ai. Fia tausaga o fa’atali Iutaia i se tupu e pei o Tavita e sau e lavea’i latou – o le uiga lea o le upu, ‘Osana’.

Mana’omia e le motu o tagata se tagata e pei o Iesu; se tasi e mafai ona fa’asa’olotoina i latou, e ui latou te le o iloa le ituaiga sa’olotoga o loo sau ma le Alii. O le mea lea na manatu ai ta’ita’i o le ‘au Iutaia e pu’e Iesu, aua e foliga mai o se tagata fouvale ma fa’atupu vevesi, e fa’alavelavea ai le filemu i le va ma le Malo o Roma, ma tupu ai le fete’enaiga.

**Tatalo:** Le lii e Iesu, ia matou manatua o oe e te fa’asa’olotoina i matou, e mai i pule a le lalolagi, a o tu’inanauga o matou loto, **Amene.**

**Aso Faraile – Setema 15: “Fegalegalea’iga i le malumalu”**

**Tusi Faitau – Mataio 21:12-27** (*Temple dealings*)

**Matua – ff. 13-14:** *“Ua fa’apea atu o ia ia te i latou, ‘Ua tusia, E ta’ua lo’u fale, o le fale tatalo; a ua faia e outou ma ana o e fao mea.’ Ona o mai ai lea ia te ia i le malumalu o e tauaso ma e pipili, ua na fa’amalolo ia te i latou.”*

Sa fa’ataga i le tulafono le suia o tupe i totonu o le malumalu. A totogi lafoga i le malumalu, e mana’omia ona suia tupe. A fa’atau foi lupe e osi ai taulaga, e suia ai foi tupe.

A o le tau o lupe e fa’atau i totonu o le malumalu, e sili mamao atu nai lo le tau o lupe o loo fa’atau i fafo o le malumalu. Peita’i, o lupe sa fa’atauina i fafo, e i ai taimi e le fa’aaogaina ai auā e pōnā ma lē lelei. Ua fai lea ma ala ua saili polōfiti ai tagata i le afu lilingi a isi tagata, aemaise lava o tagata matitiva. E lē gata i lea, o lotoā i fafo o le malumalu na latou faia ma maketi, ae pau lea o le vaega o le malumalu na fa’ataga ai fafine ma tagata ‘ese e tapua’i ai. Ua fāoa e le ‘au faioloa lenei nofoaga, ae leai se mea e tapua’i ai nai tagata le

taualoaina. Ua fa'ailoa mai e lenei tala, o Iesu ua 'auai fa'atasi ma finau atu i pule'aga ona o tagata matitiva. Ina ua ia tuli'esea o le 'au faomea, sa ia liliu atu i e fa'atauva'a—o e matitiva ma e pipili—ma fa'amaloloina i latou.

**Tatalo:** Le Atua e, foa'i mai le malamalama e iloa ai faiga fa'apolokiki leaga, ma aumai ia i matou le lototele ma le potu e tetee atu ai, **Amene.**

### **Aso Toona'i – Setema 16: “E lē faigofie ona iloa le mea moni”**

**Tusi Faitau – Mataio 21:28-46** (*It's not always easy to see the truth*)

**Matua – f.31b:** “*E moni, ou te fai atu ia te outou, E muamua atu tagata ao lafoga ma fafine talitane ia te outou i le malo o le Atua.*”

I le fa'aiuga o lenei faitauga, sa naunau le 'au ositaulaga sili ma le 'au Faresaio e pu'e Iesu, ae ua fefefe. O loo iai pea le motu o tagata i lona itu, ma ua fefefe fo'i ina ne'i avea o ia ma Mesia. I le uluai fa'ataoto, fetalai Iesu, o tagata inosia, e muamua ona ulu atu i le Malo o le Atua, auā ua latou mulimuli i ala o le amiotonu; e ui lava e foliga mai ua lē tonu o latou olaga. O le fa'ataoto lona lua, o loo fa'ailoa ai, o le 'au Faresaio ma le 'au ositaulaga sili, o ni 'au faigaluga amioleaga ua manana'o e pulea le togāvine o le malo o le Atua.

E faigofie ona tatou fa'amasinoina ta'ita'i o le lotu Iutaia, ona o lo latou amioleaga ia Iesu. Peita'i, o ta'ita'i ia sa latou fa'aauuina talatuu o Isaraelu, e ui i lo latou va feagai ai ma le Malo o Roma, o loo latou puleaina Iuta i ia vaitaimi. O le o'o mai o Iesu, e foliga mai o se tagata ua naunau e fa'aleaga le filemu i le va ma le Malo o Roma ua fia tausaga o taumafai ta'ita'i o le lotu Iutaia e tausi. E fa'apefea ona latou iloa moni, o Iesu o le Mesia?

**Tatalo:** Le Atua alofa e, foai maia le potu e iloa matou te iloa ai ou ala ma le mea moni, **Amene.**

## **O LE EVAGELIA A MATAIO (5)**

### **2 - Fete'ena'iga (Confrontations)**

### **Aso Sā – Setema 17: “E i ai le mea e ta'u o le tausami fua”**

**Tusi Faitau – Mataio 22:1-14** (*There is such a thing as a free lunch*)

**Matua – ff.4-5:** “*Ua toe aauina atu e ia nisi auauna, ua fa'apea atu, Ia outou fai atu i e na tala'iina, Fa'auta, ua ou saunia mea e taumafa, ua fafasi a'u povi ma a'u mea pepeti, ua saunia foi mea uma; ina o mai ia i le tausamaaga. A ua latou fa'atala ese mai, ua taitasi ma alu, o le tasi i lona fanua, ma le tasi i lana fa'atau.*”

O le faitauga o lenei aso, o le fa'ataoto a Iesu i le tausamaaga. Ua saunia e le tupu le tausamaaga, ma ua tala'i le 'au valaaulia e omai. A ua teena mai ma fa'atala ese le au valaaulia. E le o ta'ua i le fa'ataoto pe aisea ua fa'atala ese ai le 'au valaaulia. Pe mafua ona o le le talitonu, pe i ai se isi mafuaaga? Talu ai o le Tupu e ona le valaaulia, masalo sa manatu le 'au valaaulia e leai se mea e ta'u o le tausami fua. E iai le mea o loo i tua atu o le valaaulia.

O le upu “feteena’iga,” e afua mai ona o lagona o le masalosalo. O le feteena’iga e tupu ai le fevaevaea’i ma le vevesi. A o le feteena’iga e sili ona tuga, o le feteena’iga i totonu o tatou lava, i o tatou lagona ma manatu. E lua lava mea e ao ona tatou filifili e fai: ia pei o le ‘au valaaulia, e fa’atala ese mai ma ta’itasi ma alu lava le tagata ia i le mea e loto i ai; pe tulimata’i le Tupu, ma talia le talitonuga, e iai le mea e ta’u o le tausami fua.

**Tatalo:** Tatalo ia maua le lototele e fa’afeagai ai ma mea o le olaga o loo feteena’i ai le loto, **Amene.**

**Aso Gafua – Setema 18: “Aiā tatau ma tiute”** (*Rights and duties*)

**Tusi Faitau – Mataio 22:15-22**

**Matua – ff. 17, 21:** “*O lenei, ia e ta’u mai ia te i matou, pe se a lau taofi? Pe sa ea ona avatu o lafoga ia Kaisara pe leai? ... Ona fetalai atu ai lea o ia ia te i latou, ‘O lenei, o mea a Kaisara, ia outou avatu ia Kaisara; a o mea a le Atua ia avatu ia i le Atua.’”*

Sa taumafai tagata e mailei Iesu e ala i fesili fa’a’ole’ole. Ae sa fa’aaoga e Iesu le avanoa e a’oa’o atu ai ia te i latou. O ia tagata o soo – o tagata sa a’oa’oina - e masani e fia fesili ma fefinaua’i tali. Ae na latou iloa le loloto o le atamai o Iesu, ma e tatau ona latou mafaufau loloto i fesili e tuuina atu. O le fesili lava ia e tāua tele: “O ai e iai le aia tatau i lo tatou usiusitai?”

Ua fa’amanino mai e Iesu i lana tali, o le tiute tatau le usiusitai ia Kaisara i le totogiina o lafoga. A o le mata’utia o le tali a Iesu, na fa’amanino atili mai e le o Kaisara se atua, e ui i le tapua’iga a le emeperoa Roma lea na tapua’i iā te ia. E iai le aiā a Kaisara i nisi o tatou tiute, a o le Atua moni e to’atasi e iai le aiā mo lo tatou alofa ma le usiusitai.

**Tatalo:** Mafaufau i ou tiute tauave i le lalolagi, ma tatalo ina ia mafai ona e fa’amuumua le Atua i lou olaga, **Amene.**

**Aso Lua – Setema 19: “Avea ma tali i tagata, ae le o le fesili”**

**Tusi Faitau – Mataio 22:23-46** (*Be an answer to the person not the question*)

**Matua – ff.28-30a:** “*O lenei, a oo i le toe tu, o ai so latou o le toafitu e faimāna le avā? Auā na fai avā uma ai. Ona tali atu ai lea o Iesu, ‘Ua outou sese lava, ina ua outou le iloa upu o Tusi, ma le mana o le Atua. Auā a oo i le toe tu latou te le fai avā, pe nofo tane, a e latou te fa’apei o agelu o i le lagi.’”*

O le faitauga o lenei aso ua tatou vaaia ia Iesu, o le faifilosofia (*philosopher*). I lenei tala, o lo’o aumaia ai se feteenaiga, ina ua talitua maina e Iesu ni tuutuuga sa fa’apea na te taliaina. O le fesili sa tuuina atu e le ‘au Satukaio, e le o aga’i i se itu aoga auā ua suia e Iesu le itu o le finauga – ‘I le toetū, e lē toe fa’aipoipo ni tagata, pe toe tuuina atu e fa’aipoipo, a e latou te fa’apei o agelu o i le lagi.’

O le avea ma Kerisiano, e lē tatau fo’i ona tatou talia gūgū ni tapulaa o se feteena’iga e feagai ma i tatou. E tatau ona tuufesilisili, po o le a tonu le mea o loo talosagaina. O a ni mafuaaga moni latou te faia ai nei fesili? O lea faiga

e manaomia ai le onosai, le vaaiga fa'ale-lagi, malamalama i tusitusiga paia, le lototele e fesaga'i ai ma isi, ma le loto maualalo e talia ai fautuaga.

**Tatalo:** Ia fa'asusulu mai lou malamalama i mea e le o vaaia i lo matou ola e mafai ai ona tatou fa'apei o lau afio, **Amene.**

**Aso Lulu – Setema 20: “Ua fa’atupu vevesi Iesu”** (*Jesus stirs up trouble*)

**Tusi Faitau – Mataio 23:1-12**

**Matua – ff.3b-4:** “*A e aua tou te fa’aa’oa’o i a latou amio; auā ua latou fai atu, a e latou te le faia. Auā ua latou saisai avega mamafa ma le avegata, ma latou fa’aee i ua o tagata; a e latou te le mafafai ina fa’agaoioi ai i so latou tamatamai lima.*”

E tele fa'aupuga e fa'amatala ai Iesu: Iesu le Fa'aola, Iesu le Mesia, Iesu le tagata fa'anoanoa, Iesu le Atalii o le Tagata, ma isi. Ae seāseā ona tatou fa'amatalaina Iesu, o se tagata fa'atupu vevesi. Ae molimau le tele o tala fa'amaumau a le 'au faievagelia, e fa'avevesi e Iesu ē o i ai le pule, aemaise pe afai e saisaitia le tagata lautele ona o lo latou pule. E fa'afia ona finau Iesu ma ta'ita'i o le lotu Iutaia ma ta'ita'i 'au a le Malo o Roma? Ae to'atele foi tagata sa latou lagolagoina Iesu, e pei o le 'ausoo, o Nikotemo, ma isi; fa'apea le fitafita Roma ina iloa Iesu o le Alo o le Atua i le taimi na fa'asatauro ai.

E foliga mai, ua fai ma a tatou masani le avea o mea e maua ai le sa'olotoga, a ua tatou nonofo ma fa'atapulaa. O ta'ita'i, 'aua le fialia e fai tavini i isi ma fialia e selesele manuia o le tofi e aunoa ma se mea lelei na fai. I le faitauga atoa, o loo fa'amamafa e Iesu le taua o le auuana atu e fai ma ogatotonu o le fa'atuatua. O ta'ita'i e avea ma auuana, o le fa'a-Kerisiano lea e sili ona fialia ai le Alii.

**Tatalo:** Tatalo mo i latou o loo tauivi ma avega mamafa e aunoa ma se tasi e fesoasoani ia i latou. Iesu alofa ma fesoasoani mai, **Amene.**

**Aso Tofi – Setema 21: “Tausia foliga va’aia”** (*Keeping up appearances*)

**Tusi Faitau – Mataio 23:13-28**

**Matua – ff.23, 28:** “*Oi talofa ia te outou tusiupu ma faresaio, tagata fa’a fia amiotonu! Ua outou avatu mea e sefulu a’i o le mili, ma le aneto, ma le kumina, a ua tuu e outou o mea silisili o i le tulafono, o le amiotonu, ma le alofa, ma le fa’amaoni; e tatau pe ana faia nei mea, a e aua foi le tuu na mea ... E fa’apea foi outou, o fafo ua mataamiotonu i luma o tagata, a o totonu, ua tutumu outou i le pepelo me le amioletonu.*”

O le vaai a Iesu i faiaoga o le tulafono ma le 'au Faresaio, o ni tagata e sili ona fa'afoliga. Ua latou naunau e tausi foliga va'aia, nai lo le usita'i i le Atua. Sa latou fa'atāua le tulafono, ae fa'atuatuaana'i Lē e ona tulafono. O le 'au Faresaio i le taimi o Iesu o ni tagata fa'aaloaloga. Sa latou puipua le fa'a-Iutaia mai le puleaga a malo eseese. Ae na latou tuua'ia Iesu i le fa'afia-amiotonu. Sa manatu le 'au Faresaio e finagalo le Atua i le ususita'i ma le fa'amatalaga tonu o le tausiga o le tulafono. Peita'i, e finagalo le Atua i le

alofa mutimutivale, le fa'amasinoga tonu, ma le ola fa'amaoni. Ua tatou masani e galulue mo le vaai mai o tagata, ae le o le viiga mo le Atua. Ua tatou naunau i le sa'o, ae le o le alofa atu i o tatou tua'oi. Ua valaaulia i tatou e Iesu e su'esu'e i tatou lava, ina ia taulai lo tatou ola i mea e sili ona taua.

**Tatalo:** Keriso e, ia matou iloa ona fa'ataua mea e sili ona aoga, nai lo le fa'amalieina o le vaai mai o tagata, **Amene.**

**Aso Faraile – Setema 22: “Alofa fa'amatua” (Parental love)**

**Tusi Faitau – Mataio 23:29-39**

**Matua – ff.37,39:** *“Ierusalem e, Ierusalem e, o lē fasiotia perofeta, ma fetogi i maa i e ua aauina atu ia te oe; ua tele lava o'u manao e fa'apotopoto i lau fanau, e pei o le moa ona ofaofatai i lana toloai i lalo i ona apaau a e lei mafafai outou ... Auā ou te fai atu ia te outou, tou te le toe iloa mai a'u, seia outou fai mai, Ia manuia lē maliu mai i le suafa o le Alii.”*

E masani ona fa'aoga e Iesu le gagana a perofeta o le Feagaiga Tuai i lana tala'iga. O le tusi faitau o lenei aso, o loo fa'asolo ai le mata'utia o le ta'usalaina o ta'ita'i o le lotu Iutaia, ina ua fa'aogaina e Iesu le fa'aupuga, 'Oi talofa ia te oe' e fa'amanatu ai le Isaia 5. E tu'ufa'afeagai lava ma le fa'aaliga a Iesu i le malo o le Atua i le fa'aogaina o le fa'a 'Amuia' i le Mataio 5. Ua tala'i atu Iesu e pei o se perofeta, ua ia silafia lelei le auala na faia ai perofeta i Ierusalem.

A o le ita ua vave ona liua i le alofa loloto. Ua fetalai Iesu i lona alofa mo tagata o Ierusalem e pei o le alofa o le tinā, ua fa'apotopoto fa'atasi lana fanau, e pei ona ta'ua e Isaia le alofa o le Atua i ona tagata: 'E pei ona fa'amāfanafana e le tinā i lana tama, e fa'apea fo'i ona ou fa'amāfanafana iā te outou' (Isaia 66:13). O le alofa o le toe upu i lenei faitauga.

**Tatalo:** Tatalo mo matua, ia mautinoa ma malamalama o oe o le fanau a le Atua, ma e alofagia ma fa'amanuiaina e ia, **Amene.**

**Aso Toona'i – Setema 23: “Tala lelei mo ē lē mautinoa”**

**Tusi Faitau – Mataio 28:1-20 (Good news for the unsure)**

**Matua – ff.16-18:** *“Ona o atu ai lea o le au soo e toasefulu ma le toatasi i Kalilaia, i le mauga na poloai atu ai Iesu ia te i latou. Ua latou iloa o ia, ona latou ifo mai ai lea ia te ia; a ua masalosalo nisi. Ona maliu ave ai lea o Iesu, ua fetalai atu ia te i latou, ‘Ua tuuina mai ia te au le pule uma lava i le lagi ma le lalolagi.’”*

I Tusi Paia uma, o le ulutala o le faitauga o lenei aso o loo fa'apea mai, 'O le Poloaiga Sili'. A laugaina foi, e masani ona fa'amamafa le fa'atonuga e tala'i atu le tala lelei ia Iesu Keriso ma le fa'amagaloina o agasala. E taula'i le fa'amamafa ia Iesu, ae galo ai le 'ausoo sa potopoto i luga o le mauga, ua fa'atumulia pea i le lē mautonu ma le masalosalo.

I totonu o le ekalesia, e tatau ona i ai se avanoa mo tagata i tulaga uma o le fa'atuatua ma le masalosalo. E i ai lava le avanoa mo i latou o loo sailiili,



ma i latou ua mauaina; i latou o loo fia maua se tali, ma i latou e fia fesili. E tatau i le Ekalesia ona ofoina atu ni avanoa e malolo mai ai tagata ma saili ai le fa'afouina, fa'atasi ai ma lu'itauina ma le fa'amalosi 'au. E lei fa'amalosia e Iesu ona soo ina ia tasi lo latou mafaufau, ae sa ia talosagaina i latou e mulimuli ia te ia, ma ia iloa, o loo ia te ia le pule uma.

**Tatalo:** Le Tama e, ia i ai lou Agaga i luga ia i latou o loo maua i le le mautoni ma le masalosalo. Ia fa'aaupegaina lau ekalesia i le onosai, **Amene.**

## LŪLŪINA MA LE SELESELEINA – SOWING AND REAPING

**Aso Sā – Setema 24: “Fa’asoa a le Atua” (God’s provision)**

**Tusi Faitau – Salamo 65:9-13**

**Matua – ff.9-10:** *“Ua e asiasi i le laueleele, ma e fa’asūsūina lava; ua e fa’alafulemuteleina ai; o le vaitafe o le Atua ua tumu i le vai; ua e saunia a latou saitō ina ua fa’apea ona e sauni i ai. Ua e fa’asūsūteleina ona atu pue; e fa’atafe ifo le ua i ona utu; ua e fa’amalūlū ai i le uaga; e te fa’aolaolaina foi o moemoe.”*

I se tasi o lomiga i le gagana Latina, o lo’o fa’apea mai le fuaiupu e 9: *“Ua tafe mai vaitafe o le Atua ina ia le uma le saitō, aua ua faapea ona e fa’au’uina.”* Ioe, ia manatua, o mea ‘ai e tatau ma le aso ua fa’amanuiaina e le Atua, ma e tatau mo tagata uma. O le fa’asoa mai o le Atua mo le tausiga o le ola, o se mea e sili ona paia. E manatu fa’atauvaa ai le to’atele, ae mo atunuu o loo utiuti ai le suavai taumafa ma matelaina ona tagata i le fia ‘aai, o se mea e sili ona paia le fa’asoa mai o le Atua. O le a se fa’asoa a le Atua i lou ola?

**Tatalo:** Lavea’ina e le vai o matou lauele’ele ma fa’asusuina le galala ina ia ola, ma matou maua fa’atasi ai le ola mai lau afio, **Amene.**

**Aso Gafua – Setema 25: “Fa’amanatu le seleselega”**

**Tusi Faitau – Teuteronomie 16:13-15 (Celebrate the harvest)**

**Matua – ff.14,15b:** *“E te olioli foi i lau tausamiga, o oe, ma lou atalii, ma lou afafine, ma lau auauna tane, ma lau auauna fafine, ma le sa Levī, ma le tagata ese, ma le ua āumatuā, ma le fafine na oti lana tane o i lau aai ... auā e fa’amanuia oe e le ALII lou Atua i au mea uma e maua mai, ma mea uma e faia i ou lima, e te olioli ai lava.”*

O le tausamiga e fa’amanatu ai se mea e sili ona taua; en maua le olioli e manatua ai se mea na tupu. I le tausamiga o le Fale Apitaga, na tu’ua e tagata o Isaraelu le māfanafana o latou maota, ae fausia fale apitaga i fafo e nonofo ai i le taimi o le tausamiga, e fa’amanatu ai le tausiga alofa o le Atua mo Isaraelu i le 40 tausaga i le vao. E faigofie i le tagata ona nofo pea i lona fale pe a mae’a le seleselega ma fa’apea, “Va’ ai i mea na o’u faia ma le fa’asili ua ou maua.” O le taua o le nonofo i fale apitaga mo le vaiaso atoa, e fa’amanatu ai ia Isaraelu, o le manuia ua latou maua i le taimi nei, e mafua ona o le alofa o le Atua.

**Tatalo:** Le Atua e, ia matou iloa, o nofoaga e sili o lenei lalolagi; o le mea o lo’o i ai ma ‘auai ai lau afio. Ia matou tete’e i le leaga, **Amene.**

**Aso Lua – Setema 26: “O le ‘aiā i fanua o le ‘aiā lea i le ola!”**

**Tusi Faitau – Neemia 5:1-12** (*The right to land is the right to life!*)

**Matua – ff.10b-11:** “*Se’i tatou tuu ia lena tau’i fa’asili. Se’i outou toe tuu atu ia ia te i latou i lenei lava aso o latou fanua, o latou tovine, o latou toolive, ma o latou fale, ma le taitasi i selau tupe, ma le saito, ma le uaina, ma le uu ua outou fai fa’afa’atau ia te i latou.*”

I le faitauga o lenei aso, o lo’o faamamafa ai le fa’amasinoga tonu a le Atua. E ese lea mai le fa’amasinoga e masani ai le lalolagi e fa’ataua ai aiā tatau o le tagata e ala i le fa’aילו o le solitulafono, ia lagona le salamo, fa’amagalalo, ma fai le fa’aleleiga – o mea e aoga e toe fa’aleleia ai sootaga ma mafutaga ua afaina ona o le solitulafono. A o le fa’amasinoga tonu a le Atua, o le fa’amasinoga e naunau i le toe fuata’iina ma le fa’afouina. E le na’o solitulafono e va’ava’ai ai. E le na’o aiā tatau foi o le tagata e fa’amamafaina. A o le fa’amasinoga tonu a le Atua e, fa’amamafa ai le ‘aiā fa’ale-Atua o le tagata, aemaise i mataupu e aafia ai le ola.

O le fa’amamafa lea a Neemia i le tusi faitau o lenei aso. E le o vaai Neemia i ‘aia tatau o tagata faipisinisi sa latou fa’atauina fanua o nai tagata matitiva, ma toe fa’afaigaluega tagata e ona fanua mo se tupe fa’asili. Ae fa’amamafa e Neemia ‘aiā fa’ale-Atua o nai tagata matitiva, e tatau ona toe fa’afai ai o latou fanua. O le ola e fesootai ma le fanua, ae le o le tupe fa’asili.

**Tatalo:** O le lalolagi ma mea uma o i ai o au na faia le Atua, a’oa’o mai ina ia matou tauisi i lou amiotonu ma lou filemu, **Amene.**

**Aso Lulu – Setema 27: “Fa’asoa atu i ē o manaomia le fesoasoani”**

**Tusi Faitau – Ruta 2:2-8** (*Sharing with those in need*)

**Matua – ff.2,8:** “*Ua fai atu Ruta le Moapi ia Naomi, so’u alu i se fanua, ma ao ai ni fua o le karite, o mulimuli i sē alofa mai ia te au. Ua fai mai o ia ia te ia, La’u tama e, ina alu ia ... Ua fai atu Poasa ia Ruta, E te le fa’alogo mai ea, lo’u afafine e? ‘aua e te alu e ao i se tasi fanua ese, auā foi e te tuuna le mea nei, a ia e tumau iinei ma a’u auāuna fafine.*”

O le tusi o Ruta o lo’o fa’ataua ai le tausiga o tagata ese ma tagata sulu-fa’i. Fa’aalia mai e le tusi ni faiga e mafai ona fesoasoani ai e fausia se mafutaga i le lotogatasi, o le agalelei, ma le filemu. O Poasa o se fa’ata’ita’iga o le alofa ma le agalelei. A o le va o Ruta ma Naomi le fa’avae atoa. O le fili-filiga a Ruta e tu i tafatafa o Naomi i taimi o faigata, o le ata fa’ata’ita’i lea i le mea taua e moomia e fausia ai le lumana’i manuia o aiga ma ma nu’u. O Naomi ma lona tu’uafatasia o Ruta ma Poasa, e atagia ai le fa’autautau ma le naunau mo se lelei lautele. A o Ruta uma ma Naomi, o fafine ua matitiva ua leai se lumanai e maua ona o le tulaga pagatia ua oo i oo i ai. Ae atagia i le tala le ola fa’asoa; fa’asoa le isi i le isi, e ui i le matitiva ma le le tagolima.

**Tatalo:** Fesoasoani lau afio i le lalolagi o lo’o i ai le puapuagaina, ina ia latou maua lou manuia e fa’avavau, **Amene.**

**Aso Tofi – Setema 28: “Seleseleina o mea na lūlūina e isi ”**

**Tusi Faitau – Ioane 4:35-38** (*Reaping what others have sown*)

**Matua – ff.35b-36, 38a:** *“Fa’auta, ou te fai atu ia te outou, ina tepa ae ia o outou mata, ma vaavaai i le fanua ua sinasina mai nei i le seleselegāsaito. O lē seiesele foi, e maua lana totogi, ma fa’aputu le fua e oo i le ola fa’avavau; ina ia fa’atau olioli o lē lulu saito ma lē selesele ... Ua ou auina atu outou e selesele i le mea sa outou le galulue ai.”*

O le avefa ma Faifeau tala’i i totonu o atunu’u ese, ua maua ai lagona ma manatu ina ia taumafai e tu’u fa’atasia ai mafutaga fa’akerisiano. O tagata ua maua mafutaga fa’a-kerisiano i totonu o si’osi’omaga e ese mai le masani. O lo’o masani fo’i ona va’aia lea tulaga i le galuega o lo’o tatou galulue ai, ae maise i atunu’u e pei o Amerika, Hawai’i, atoa ai ma nisi atunu’u. E ese’ese aganu’u, ae ua mafai ona tasi i le olaga fa’akerisiano.

O le galuega e mana’omia ai le ola feso’ota’i ina ia mafai ona maua mai ni fesoasoani e atia’e ai le misiona. O le tele o nei Faifeau tala’i e masani o maua mai la latou fesoasoani mai isi Faifeau ma ta’ita’i o isi Ekalesia ina ia fesoasoani ai mo se atunu’u o lo’o tau atina’e. O la tatou galuega, ua na ona toto ma fa’asusu e pei o se la’au, a’o le Atua; o ia e na te fa’atupuina ina ia tupu ma ola. Ia tatou fa’afetai ai i le Atua.

**Tatalo:** Tatalo mo le galuega misionare i le lalolagi ma Ekalesia tau atina’e, ia fa’amanuia le Atua ia i latou ma e ua fesoasoani, **Amene.**

**Aso Faraile – Setema 29: “Seleseleina o mea na e lūlūina”**

**Tusi Faitau – Kalatia 6:7-10** (*Reaping what you sow*)

**Matua – ff.9-10:** *“Aua ne’i tatou fa’apalapala i le amio lelei; auā o ona po e tatau ai tatou te selesele mai ai, pe afai tatou te le fa’avaivai. O lenei, ia tatou agalelei, ia fa’atau i mea e tutupu i lea aso ma lea aso, i tagata uma lava, aemaise i le aiga o le fa’atuatua.”*

O le upu ‘atiina a’e’, o le saunia lelei po le fa’ato’a lea o se fanua e totoina ai se fa’atoaga. O lo’o fa’amatalaina ai fo’i le so’otaga i le va o le tagata galue ma le ele’ele. E taua le femalamalamaa’i o le tagata ma le ele’ele. Ua tele ina tatou fa’atama’ia ma so’onafai le lauele’ele. Ua tele ina fa’amalie o tatou mana’o i le oa, ma ua fai ma ala ua tatou manatu mama ai i le taua o le so’otaga o le tagata ma le ele’ele. O le eleele o le fa’amanuiaga a le Atua, e auala mai ai foi le tamaoiaiga mo le ola o le tagata. Ia tausia lelei le laueleele, aua e selesele lava e le tagata le mea na te luluina.

**Tatalo:** Ia tupu lo matou malosia e galulue i lau feau, ‘aua ne’i o matou fa’avaivai ina ne’i o matou le selesele i lou manuia, **Amene.**

**Aso Toona’i – Setema 30: “Ua tuuina atu e le Atua le tino i le fatu”**

**Tusi Faitau – 1 Korinito 15:35-44** (*God gives a body to the seed*)

**Matua – ff.42b-44:** *“E luluina ma le pala, e toe fa’atuina mai ma le le pala; e luluina ma le matagā, e toe fa’atuina mai ma le matagofie; e luluina ma le vaivai, e toe fa’atuina mai ma le malosi; e luluina le tino fa’aletino, e toe fa’atuina mai o le tino fa’aleagaga; e i ai le tino fa’aletino, e i ai foi le tino fa’aleagaga.”*

E mafai ona teu le fatu i se taimi umi poo se taimi puupuu, ae tatau ona lulu i le ele’ele e tupu ma ola ai. I le olaga fa’akerisiano, e le pei tatou o ni fatu e soona teu, a o le fatu e tuu loa i le eleele ma fa’afailele ina ia ola.

O le taimi o le ulua’i ekelesia ma lona atina’eina, sa tele ai le sauaina o tagata kerisiano. O le fatu na toto ae na fa’afailele ma fa’asusu pea ina ia ola. E mafai ona natia o tatou lagona fa’aleagaga ina ua sauaina ma inosia i tatou, a’o tua atu o na sauaga o lo’o ta’oto ai le manuia ma fua o le fatu lelei na toto ma fa’asusu ina ia ola. Aua o le mana’oga lea o tatou tagata, ina ia va’aia fua o a tatou galuega.

**Tatalo:** Le Atua, aua ne’i o matou ola faia’ina i sauaga o le olaga; ia matou maua lou amiotonu, fua mai le fa’amoemoe ola mo i matou, **Amene.**



Tautua Printing Press EFKAS  
P.O. Box 1537, Pago Pago, AS 96799  
(684) 699-9810; [cccas@efkasonline.org](mailto:cccas@efkasonline.org)  
<https://efkasonline.org>